

Bosna i Hercegovina
Federacija Bosne i Hercegovine
ZENIČKO-DOBOJSKI KANTON
OPĆINA MAGLAJ
OPĆINSKO VIJEĆE

Broj: 02-05-1-439/17
Datum, 02.03.2017.godine



Bosnia and Herzegovina
Federation of Bosnia and Herzegovina
ZENICA – DOBOJ CANTON
MAGLAJ MUNICIPALITY
MUNICIPAL COUNCIL

ZAPISNIK

Sa 4. sjednice Općinskog vijeća Maglaj
održane dana 02.03.2017.godine u 11,00 sati u sali
JU Dom kulture «Edhem Mulabdić» Maglaj

Sjednicom predsjedava Svjetlana Zamboni, predsjedavajući OV.
Sjednici prisutni općinski načelnik Mirsad Mahmutagić, Azra Čakrama, predstavnik općinske administracije.
Zapisničar, Mirsada Skejić.

Predsjedavajuća OV, govori na osnovu člana 59. Poslovnika o radu Općinskog vijeća Maglaj i zaključka Kolegija OV od 02.03.2017.godine, Programa rada OV za 2017.godinu, te ukazane potrebe otvaram 4. redovnu sjednicu Općinskog vijeća Maglaj.

Na današnju sjednicu pozvani su vijećnici parlamentarnih političkih stranaka, SDA-a, SDP-a, SBB, DF, HDZ, SBiH, SP/U. Pozivan je i Općinski načelnik, rukovodioci općinskih službi, predstavnici JU i JP, kao i predstavnici čiji materijali će biti razmatrani na današnjoj sjednici OV. Poziv za sjednicu i materijal dostavljeni su OSCE-ovom uredu Travnik i sredstvima informisanja koji prate rad današnje sjednice Vijeća. Sve vas pozdravljam i pozivam da svako na sebi svojstven način odamo dužnu počast onima koji su svoje živote ugradili u zemlju, domovinu nam Bosnu i Hercegovinu i svim žrtvama rata.

Pozivam predstavnika Općinskog vijeća da prozivkom utvrdimo broj prisutnih vijećnika.

Konstatujem da sjednici prisustvuje 24 vijećnika.

Nije prisutan vijećnik Josip Jurišić.

Konstatujem da OV može punovažno raditi, odlučivati, donositi odluke, zaključke i rješenja, ovim je ispoštovan član 88. Poslovnika o radu OV Maglaj.

U skladu sa članom 80. Poslovnika o radu na današnjoj sjednici izvršiti ćemo verifikaciju zapisnika sa 3. redovne sjednice OV.

Da li ima primjedbi na zapisnik sa 3. redovne sjednice?

Vijećnik Safet Jašić, kada je u pitanju izvod iz zapisnika, imamo primjedbi, diskusije pojedinih vijećnika dobro reducirane. Tražim da se diskusije u cijelosti prenose.

Predsjedavajuća OV, vi se sjećate da smo na sjednici Kolegija dogovorili da će zapisnik sačinjavati diskusije samo u dijelu prijedloga koji se izlažu, a da će cjelokupan tok sjednice biti snimljen na CD i dostavljen svim političkim partijama. O tome možemo na Kolegiju još razgovarati.

Predsjedavajuća OV, otvaram raspravu po pitanju dnevnog reda koji ste dobili u sazivu, da li ima prijedloga za dopune dnevnog reda?

Nije bilo prijedloga. Dajem na glasanje dnevni red kako je došao u sazivu.

DNEVNI RED

1. Prijedlog Odluka o postupcima, standardima i kriterijima imenovanja na pozicije u reguliranim tijelima Općine Maglaj;
2. Prijedlog Odluke o raspodjeli novčanih sredstava za studentske stipendije za akademsku 2016/2017. godinu;
3. Prijedlog Kriterija za dodjelu stipendija redovnim studentima općine Maglaj za akademsku 2016/2017. godinu;
4. Prijedlog Odluke o pristupanju izradi Regulacionog plana "Groblje – Borik" u Maglaju;
5. Prijedlog Odluke o prosječnoj konačnoj građevinskoj cijeni 1m² korisne stambene površine;
6. Prijedlog Odluke o kriterijima za prodaju građevinskog zemljišta neposrednom pogodbom;
7. Prijedlog zaključka na inicijativu MZ Kosova o vraćanju na snagu planske dokumentacije urbanistički red-urbanistički plan Kosova;

8. **Prijedlog Odluke o usvajanju izmjene Regulacionog plana "Misurići" (zahtjev "HM promet" d.o.o. Maglaj).**
9. **Prijedlog Odluke o usvajanju izmjene Regulacionog plana "Centar Maglaj-južni dio" (zahtjev Ljuca Adis, Sović Sanja i Bureau Amra);**
10. **Rješenje o odbijanju zahtjeva Džino Petrol" d.o.o. Maglaj, za dodjelu neizgrađenog gradskog građevinskog zemljišta radi gradnje uz postojeću parcelu;**
11. **Prijedlog Odluke o pristupanju izmjenama i dopunama Poslovnika o radu OV;**
12. a) **Izveštaj o radu komunalno-sanitarno-vodoprivrednog inspektora za period 1.1. – 31.12.2016. godine;**
b) **Program rada za 2017. godinu;**
13. a) **Godišnji Izveštaj o radu urbanističko-građevinskog i putnog inspektora za period 1.1. – 31.12.2016. godine;**
b) **Plan rada za 2017. godinu;**
14. **Nacrt Strategije prema mladima općine Maglaj 2016-2020. ;**
15. **Informacija o deminiranju, obilježavanju, uništavanju neeksplozivnih ubojnih sredstava te provođenju akcije «Žetva» na općini Maglaj u 2016. godini;**
16. **Izveštaj o dostignutom stepenu usklađenosti normativnih akata Općine Maglaj sa zakonima iz oblasti prostornog planiranja, građenja i komunalnih djelatnosti sa prijedlogom mjera;**
17. **Informacija o kretanju zapošljavanja i nezaposlenosti na području općine Maglaj za 2016. godinu;**
18. **Izveštaj Komisije za socijalnu zaštitu/skrb i inkluziju općine Maglaj za 2016. godinu (01.01.2016.- 31.12.2016. godine) i Matrica monitoringa implementacije aktivnosti „Akcionog plana jačanja sistema socijalne zaštite i inkluzije u općini Maglaj, sa fokusom na raseljena lica i povratnike, za 2016-2017. godinu” ;**

Vijećnik Hajrudin Fermić, prije nego se izjasnimo o prijedlogu dnevnog reda, ja bih zamolio kratku pauzu ukoliko se dozvoli, radi konsultacija i usaglašavanja šefova klubova. Zamolio bih pauzu od 2-3 minute.

Pauza za predsjednike klubova

Predsjedavajuća OV, prije nego otvorimo diskusiju po pitanju dnevnog reda , dajem na verifikaciju zapisnik sa 3. redovne sjednicu uz sugestiju vijećnika Jašića.

Usvojeno jednoglasno sa 24 glasa za.

Predsjedavajuća OV, nema sugestija na prijedlog dnevnog reda , samo jedna napomena kako smo se dogovorili na Kolegiju prije razmatranja dnevnog reda kako smo se dogovorili, Načelnik će informisati o aktivnostima između dvije sjednice. Stavljam na glasanje prijedlog dnevnog reda za 4. redovnu sjednicu OV.

Usvojeno jednoglasno sa 24 glasa za.

Općinski načelnik Mirsad Mahmutagić, kratko ću vas obavijestiti o aktivnostima između dvije sjednice.

Pored redovnih aktivnosti i općinskih službi kao i Općinskog načelnika iskoristit ću priliku da vas informišem o nekoliko interesantnih dešavanja u periodu između dvije sjednice.

- Prvo, kako ste i imali priliku da se informišete krećemo sa nastavkom rekonstrukcije ulice Srebreničkih žrtava rata. Ukupna vrijednost nastavka radova cca 1,5 miliona KM i radovi trebaju biti završeni do kraja šestog mjeseca. Učinit ćemo sve s naše strane da taj rok pokušamo i skratiti. Radi se o dionici od cca 750 m ukupne dužine. To ćemo zajedno sa investitorom, izvođačem radova i nadzorom pratiti i korigovati određene detalje. Prije svega mislim u smislu da možda skratimo koji metar dužinu rekonstruisane saobraćajnice a da eventualno produžimo u ovoj fazi trotoara i uličnu rasvjetu prema Natron-Hayatu, ali o tom potom.

- Druga bitna aktivnost je ono što će biti i tema današnje sjednice OV, rješavanje pitanja groblja. Zna se da se radi o dugogodišnjem problemu koji bivša vlast nije htjela riješiti iako je to civilizacijski problem. Danas pred vama je materijal i odluka je na vama. Ono što ću reći u ovom trenutku je da je pronađena prihvatljiva lokacija za koju ne očekujemo nikakva osporavanja od bilo koga i nadam se da taj civilizacijski problem možemo riješiti u relativno kratkom periodu.

- Dalje, u toku su aktivnosti koje vodimo u saradnji sa UNDP na uključivanju lokalne zajednice kroz partner grupu i sektorske grupe ili podgrupe u tokove odlučivanja o daljim pravcima razvoja naše općine. U tom pogledu je formiran i općinski razvojni tim koji radi na reviziji strategije razvoja općine Maglaj.

- Istovremeno radimo na obezbjeđivanju sredstava za rješavanje određenih infrastrukturnih problema kao što su npr. problemi blokade svih podvožnjaka na ulazima u grad tokom jačih kiša. Energetska efikasnost ulične rasvjete itd. Kada budu konkretni rezultati bit ćete informisani.

- Kako znate riješen je i višegodišnji problem mliječne pijace. Mliječna pijaca se nalazi unutar zatvorenog objekta tržnog centra opremljena potrebnim rashladnim vitrinama. Bitno je napomenuti da dileme i glasine koje su opterećivale naše lokalne proizvođače da moraju registrovati obrt su riješene odgovorom nadležnog federalnog ministarstva koje je potvrdilo da je dovoljno da imaju papir da su registrovani kao poljoprivredno gazdinstvo.

- I na kraju da pomenem tragičan i tužan događaj koji se desio na području općine Maglaj. To je nažalost pogibija naše sugrađanke djevojčice Salkić Mejrem. Kako znate tragičan slučaj se desio na saobraćajnici M-17 u zoni gdje se koristi prijelaz preko M-17 bez ikakvih sigurnosnih mjera. Napominjem da sam prisustvovao zboru građana MZ Liješnica gdje smo obećali alternativno rješenje do konačnog rješavanja ovog problema. Nažalost s početkom radova pojavila se grupa mještana koja brani izvođenje radova. Sada je loptica na MZ Liješnica, neka riješe problem unutar sebe mi ćemo odmah rješavati alternativni prijelaz. Istovremeno sutra u Sarajevu imamo sastanak sa direktorom JP Ceste FBiH gdje ćemo razgovarati oko rješavanja ovog problema ali i još nekih drugih problema. Ne treba zaboraviti da naši sugrađani su primorani prelaziti saobraćajnicu M-17 a najčešće školarci na više lokacije bez ikakvog dodatnog osiguranja kao što su slučajevi u Međićima, Misurićima, Poljicu, Moševcu, Kosovi i gdje sve.

- Revizija finansijskog poslovanja, prema odluci OV bit će raspisana javna nabavka za izbor revizora s obzirom da smo od Agencije za reviziju finansijskog poslovanja institucija FBiH dobili odgovor da Općina Maglaj nije planirana za reviziju tokom 2017. godine.

Na kraju da napomenem da OV mora ući u priču rekonstrukcije mjesnih zajednica pogotovo onih gdje su pojedinci uzurpirali MZ kao svoju prćiju kao što su Misurići, Liješnica, Bočinja, Kosova, Čobe, Kopice i neki drugi.

AD – 1 Prijedlog Odluka o postupcima, standardima i kriterijima imenovanja na pozicije u reguliranim tijelima Općine Maglaj;

Predsjedavajuća OV, otvaram raspravu po pitanju prve tačke. Da li ima potrebe da obrađivač se obrati Općinskom vijeću. Nema.

Vijećnik Hajrudin Fermić, želim iznijeti neka zapažanja koja mi u DF već dvije sjednice ovdje iznosimo, a treba ih i ponoviti. Kad je u pitanju postupak donošenja Odluke o postupcima, standardima i kriterijima imenovanja na pozicije u reguliranim tijelima Općine Maglaj. Naime, pokazalo se i kroz ovaj proces izrade ove Odluke da bilo koje pitanje, da po bilo kom osnovu, bilo kojoj oblasti, ne može i ne smije da bude niti samovolje, niti paušalnog procjenjivanja, niti zloupotrebe ili prekoračenja ovlaštenja bilo kojeg pojedinca ili institucije ili organa i svega onoga što se ovdje dešavalo u prethodnom periodu a vezano za postavljanje članova upravnih i nadzornih odbora u Javnim ustanovama i preduzećima, zapravo je rezultat upravo takvih postupaka koji su se dešavali u prethodnom periodu....

Ovdje se radi samo o ispravljanju pogrešaka u vođenju zakonske procedure, zapravo radi se o tome da mi postavljamo stvari u zakonske regulative i želimo da radimo u skladu sa zakonima. Također je značajno reći da u prijedlogu ove Odluke su konsultovani more i mnoštvo zakona koji regulišu ovu oblast. Ovo nije oblast koja se rješava samo na osnovu Zakona o ministarskim, vladinim i drugim imenovanjima u reguliranim tijelima. Ova Odluka mora u sebi da sadrži i druge zakonske odredbe Zakon o javnim ustanovama, Zakon o javnim preduzećima sa svim izmjenama, Zakon o zdravstvenoj zaštiti, Zakon o veterinarstvu, Zakon o apotekarstvu, Zakona o predškolskom obrazovanju, Zakona o sukobu interesa...

Analizirajući ponuđeni prijedlog vidimo da je on izdržao sve te testove i da je urađen konačno u skladu sa svim tim zakonskim odredbama...

Imam prijedlog zaključka da Načelnik u sklopu ove tačke dnevnog reda predloži sastav Komisije za izbor i imenovanja, kako bi ta komisija već od sutra mogla da krene u postupak procedure kako je zakonom propisano i imenovanje upravnih i nadzornih odbora, odnosno svih onih reguliranih tijela kako je to u prijedlogu ove odluke i predviđeno.

Vijećnica Selma Avdić, stav Kluba SDA Maglaj po pitanju prijedloga Odluke o postupcima, standardima i kriterijima imenovanja na pozicije u reguliranim tijelima Općine Maglaj.

1.)Klub vijećnika SDA ne prihvata prijedlog Odluke o utvrđivanju standarda i kriterija imenovanja na pozicije u reguliranim tijelima općine Maglaj, s obzirom da se ova Odluka donosi samo iz razloga kako bi se izvršila smjena

dosadašnjih članova upravnih i nadzornih odbora i odbora za reviziju koji su izabrani u skladu sa prethodnom Odlukom o imenovanjima u reguliranim tijelima općine Maglaj.

Obrazloženje: nije nikakvo kršenje zakona ukoliko su ovlasti kod procedure popune članova skupštine, odbora za reviziju, nadzornih i upravnih odbora ovlasti Općinskog vijeća prenesene na općinskog načelnika, obzirom da su u tom slučaju predviđeni instituti u II-stepenom postupku u kojem se nalazi i Općinsko vijeće, a u dostavljenom prijedlogu odluke institut II-stepenog postupka ne postoji. Takođe u obrazloženju je trebalo dostaviti i koje su to odredbe važeće odluke u suprotnosti sa zakonom od strane nadležnog općinskog organa za ovu oblast.

2.) I u novom prijedlogu odluke u članu 8. tačka 1. (Ispunjavanje uvjeta za članove skupštine, odbora za reviziju i nadzornog odbora) pod a) definisano je da može biti imenovano lice sa SSS i VŠS, što je u suprotnosti sa zakonom. Sa VŠS i SSS je moguće popuniti poziciju samo u slučaju da se radi o popuni člana iz reda roditelja ili zaposlenika javne ustanove i javnog preduzeća kada je to definisano Statutom JU i JP, a nikako iz reda predstavnika građana, korisnika ili suvlasnika udjela (samo u slučaju KJD može biti imenovan član po osnovu udjela odnosno vlasništva).

Takođe u tački b treba brisati VŠS ili SSS, bez obzira na radno iskustvo..

Također pod d) je uskraćeno osnovno ljudsko i demokratsko pravo da neko ko je član ili vlasnik uprave privrednog društva koje je u većinskom privatnom vlasništvu ne može biti imenovano u naprijed navedena tijela, a ova problematika je definisana Zakonom o sukobu interesa.

3.) Iste primjedbe se odnose i na član 8. tačka 2. u kojem se govori o uvjetima za pozicije članova upravnih odbora javnih ustanova i javnih preduzeća (kao što je u članu 8. stav 1.) i to i na tačku 8.a i na tačku 8.b i na tačku 8. d.

4.) Ni u članu 8. tačka 1. a ni u članu 8. tačka 2. nije definisano po kojim kriterijima se vrši bodovanje od tačke a) do tačke d) i koliko se po tim kriterijima dodjeljuje bodova.

5.) U članu 18. stav 1. govori se o prijedlogu rang liste i o „neakvim« opravdanim razlozima da se vjeruje da principi i procedure utvrđene ovom odlukom nisu ispoštovane itd. ..., što je apsolutno nejasno definisano i nerazumljivo, te ovaj član 18. bi trebalo potpuno jasno definisati, kako se ne bi manipuliralo sa ovim što je navedeno u prvom stavu.

6.) U poglavlju 7. prigovori član 20. stav 2. se kaže da se prigovori podnose Općinskom vijeću, koje dostavlja kopiju prigovora Ombudsmenu za ljudska prava BiH.

Na ovaj način prigovori nikada neće biti riješeni ,a praksa je da se utvrdi II-stepeni organ i da se prava podnosioca prigovora mogu ostvariti i putem suda ukoliko je prekršen zakon koji reguliše ovu oblast, odnosno putem nadležnih pravosudnih institucija.

7.) Potpuno ista primjedba odnosi se i na član 21. stav 1.

Općinski načelnik, kako nema više diskusija, ja mogu predložiti Komisiju odmah. Predlažem slijedećih pet osoba i to je Bašić Sadina, kao predsjednik komisije, Mahmutović Merima, Dundžer Dragomir, Saračević Jasminka i Sofić Mirsada.

Predsjedavajuća OV, ići ćemo redom, prvi prijedlog zaključaka bio je iznesen od strane dopredsjedavajućeg koji je predložio da se usvoji Odluka o postupcima, standardima i kriterijima imenovanja na pozicije u reguliranim tijelima Općine Maglaj, ko je za

Glasalo je 13 za - Svjetlana Zamboni, Nedžad Lokmić, Mirza Bradarić, Armin Hrnjić, Anida Šahman, Irena Herceg, Firuz Galijašević (SDP), Hajrudin Fermić, Fikret Delić (DF), Muhamed Hrnjić, Mustafa Bešić (SBB), Mustafa Buljubašić (SP/U), Elvir Vehabović (SBiH).

Glasalo je 11 protiv - Adis Abdurahmanović, Nedžad Alispahić, Selma Avdić, Kanita Bašić, Mirsad Bejzić, Benjamin Čičkušić, Safet Jašić, Edina Jašić, Ermina Muminović, Dženita Smajlović (SDA).

Predsjedavajuća OV, konstatujem da je Odluka usvojena i predlažem

Z A K L J U Č A K

1.1. Usvaja se Odluka o postupcima, standardima i kriterijima za imenovanja na upražnjene pozicije u reguliranim tijelima Općine Maglaj.

Predsjedavajuća OV, dajem na glasanje prijedloga zaključaka iznesene od strane Kluba SDA, ko je za

Glasalo je 11 za - Adis Abdurahmanović, Nedžad Alispahić, Selma Avdić, Kanita Bašić, Mirsad Bejzić, Benjamin Čičkušić, Safet Jašić, Edina Jašić, Ermina Muminović, Dženita Smajlović (SDA).

Glasalo je 13 protiv - Svjetlana Zamboni, Nedžad Lokmić, Mirza Bradarić, Armin Hrnjić, Anida Šahman, Irena Herceg, Firuz Galijašević (SDP), Hajrudin Fermić, Fikret Delić (DF), Muhamed Hrnjić, Mustafa Bešić (SBB), Mustafa Buljubašić (SP/U), Elvir Vehabović (SBiH).

Predsjedavajuća OV, konstatujem da prijedlog zaključaka iznesen od strane Kluba SDA nije usvojen,

Stavljam na glasanje prijedlog članova komisije kako je predložio Općinski načelnik , ko je za

Glasalo je 13 za - Svjetlana Zamboni, Nedžad Lokmić, Mirza Bradarić, Armin Hrnjić, Anida Šahman, Irena Herceg, Firuz Galijašević (SDP), Hajrudin Fermić, Fikret Delić (DF), Muhamed Hrnjić, Mustafa Bešić (SBB), Mustafa Buljubašić (SP/U), Elvir Vehabović (S BiH).

Glasalo je 11 uzdržanih - Adis Abdurahmanović, Nedžad Alispahić, Selma Avdić, Kanita Bašić, Mirsad Bejić, Benjamin Čičkušić, Safet Jašić, Edina Jašić, Ermina Muminović, Dženita Smajlović (SDA).

Predsjedavajuća OV, konstatujem da je prijedlog članova za sastav Komisije usvojen i predlažem

ZAKLJUČAK

1.2. Na prijedlog Općinskog načelnika, Usvaja se Odluka o izboru Komisije za imenovanja u regulirana tijela Općine Maglaj u sljedećem sastavu:

- Bašić Sadina – predsjednik,
- Mahmutović Merima,
- Dunder Dragomir,
- Saračević Jasminka,
- Sofić Mirsada,

AD – 2. Prijedlog Odluke o raspodjeli novčanih sredstava za studentske stipendije za akademsku 2016/2017. godinu;

AD – 3. Prijedlog Kriterija za dodjelu stipendija redovnim studentima općine Maglaj za akademsku 2016/2017. godinu;

Predsjedavajuća OV, da li želite da se zajedno raspravlja i Odluka i Kriteriji za dodjelu stipendija za akademsku 2016/2017.godinu.

Otvaram raspravu.

Vijećnik Hrnjić Armin, Komisija za pitanje mladih i ravnopravnost spolova na sjednici održanoj dana 15.02.2017.godine razmatrala je prijedlog Odluke i Kriterije za dodjelu stipendija za 2016/2017.godinu i donijela je sljedeće zaključke:

1.Komisija predlaže Općinskom vijeću da usvoji Odluku o raspodjeli novčanih sredstava za studentske stipendije za akademsku 2016/2017. godinu.

2. Komisija predlaže Općinskom vijeću da usvoji Kriterija za dodjelu stipendija redovnim studentima općine Maglaj za akademsku 2016/2017. godinu.

3. Također Komisija sugeriše Općinskom vijeću da svake godine prije donošenja Kriterija preispita koja su to deficitarna zanimanja. Tražiti od nadležnih ustanova i preduzeća koja su to deficitarna zanimanja i na osnovu toga predlagati kriterije za svaku narednu godinu.

Vijećnik Galijašević Firuz, ja ću se dotaći samo deficitarnih zanimanja. Deficitarna zanimanja nisu isto kao i najtraženija zanimanja. Deficitarna zanimanja su zanimanja za koja postoji veća potražnja od ponude. Da li je deficitarno zanimanje ono koje niko ne traži? ... Da li su iz tačke 3. nabrojana sva zanimanja koja su deficitarna? Mene zanima samo trenutno jedno zanimanje i to će biti moj prijedlog „inženjer tekstilne tehnologije“. Čak iz drugih općina nam traže to zanimanje. Znači da imamo tri firme koje zapošljavaju najveći broj. Možda u ovom trenutku nemamo nikoga da studira tekstilnu tehnologiju, ali iduće godine će možda neko upisati taj fakultet s namjerom da će biti taj fakultet deficitarno zanimanje.

Vijećnik Hajrudin Fermić, želim prenijeti neke stavove koji su izneseni u DF kad smo raspravljali o ovim pitanjima. Mi jesmo stava da općinske stipendije, ovo što dijelimo iz općinskog budžeta, mora i treba da ima cilj socijalnog karaktera. Poslije toga treba da bude jedan od ovih kriterija prilikom dodjele uspjeh u studiranju i naravno treći kriterij da bude iz deficitarnih-potrebnih zanimanja. Ovdje je na neki način obrnuto. Ima tu dilema i političke i svake druge prirode. Želim da se kaže da bi dobro bilo da Komisija za obrazovanje i Komisija za mlade, već od završetka ove sjednice rade na jednoj sistemskoj odluci i kriterijima koji će malo duže važiti i koji će odgovarati zahtjevima građana. Ima tu nekih pitanja, šta ako nama fali ljekara. Da li se može naći modus da se sa Domu zdravlja potpiše ugovor da se iz ovih sredstava koja su planirana za općinske stipendije prebacuje Domu zdravlja koji bi pravio ugovor sa studentima medicine da se uzme dodatni broj studenata i da se taj student veže na određeno vrijeme i da radi u Domu zdravlja i odradi to, da imamo nešto od njega. Može se to uraditi i sa nekim

drugim ustanovama i preduzećima. Govorimo o deficitarnim zanimanjima. Šta je sa onim studentima tzv. Bolonjskog ciklusa, kako oni iz Službe kažu dodiplomski i post-diplomski studij... Mi iz DF ćemo podržati ovu Odluku i Kriterije, ali sa zaključkom da ove dvije Komisije u saradnji sa Službom zaista u kontinuitetu malo to bolje i kvalitetnije izvrše, istraže i da donesu jednu pravu, pravednu odluku.

Ne smijemo zaboraviti da osim ovih 40.000 KM u Budžetu imamo još jednu stavku u Budžetu koja isto tako može objektivno da pomogne izuzetnim studentima prilikom studiranja, tako da to sve imamo na umu prilikom donošenja ovakve odluke.

Vijećnik Elvir Vehabović, Komisija za obrazovanje nauku, kulturu i sport na sjednici održanoj dana 17.2.2017. godine donijela je zaključke u kojim predlaže Općinskom vijeću da usvoji Odluku o raspodjeli sredstava za studentske stipendije za akademsku 2016/2017 godinu. Komisija također predlaže Općinskom vijeću da usvoji Kriterije za dodjelu stipendija redovnim studentima općine Maglaj za akademsku 2016/2017 godinu. Komisija sugerira da se svake godine prije donošenja Kriterija preispita koja su to deficitarna zanimanja.

Prihvatam i sugestiju dopredsjedavajućeg da ove dvije Komisije se uključe u pripremi za narednu godinu i prijedlog Kriterija.

Što se tiče Doma zdravlja ja sam primao zadnje dvije godine stipendiju i činjenica je da nama studentima nikada nije dovoljno novca. Da li da se to daje ustanovama, da li da Općina dio tih sredstava prebaci tim ustanovama koje će na neki način ugovorom vezati tog studenta...

Predsjedavajuća OV, u ime Kluba SDP-a a obzirom da se o ovome dugo raspravljalo obzirom na važnost stipendija za mlade kao i za prosperitet općine Maglaj imali smo nekoliko dilema vezano za deficitarna zanimanja navedena u materijalu inženjer elektrotehnike –smjer energetika to je sasvim jasno, međutim profesor fizike i profesor matematike i psiholog. U našem razgovoru obzirom na ovaj Bolonjski proces. Vi imate sada profesora fizike i matematike koji imaju 240 bodova po ovom trogodišnjem studiju koji nisu u sferi deficitarnih zanimanja, međutim ti studenti ne mogu raditi u Gimnaziji, iz tog razloga oni ne mogu biti deficitarni. Možda je potrebno da kriteriji sadrže, dakle potrebno je navesti koliko bodova je potrebno da ima ta diploma kako bi to zanimanje bilo deficitarno. U suprotnom mi imamo ljude koji jesu prof. matematike na Birou, ali ne mogu raditi u ustanovama koje tragaju za tim kadrom pa lica iz drugih općina popunjavaju ta radna mjesta a mi nemamo tog kadra. Mislim na tih 300 bodova.... Možda da jednim zaključkom obuhvatimo i tu sferu ...

Vijećnica Edina Jašić, Klub vijećnika SDA ne prihvata stavove Komisija, ali u interesu studenata prihvata prijedlog Odluke o raspodjeli novčanih sredstava za studentske stipendije za akademsku 2016/2017. godinu.

Također prihvatamo i Kriterije za dodjelu stipendija redovnim studentima općine Maglaj za akademsku 2016/2017. godinu.

Predsjedavajuća OV, još jedna sugestija Komisija za obrazovanje, Komisija za mlade i Komisija za statutarna pitanje, poslovnik i propise je zasjedala po ovom pitanju, te su donijeli jedan prijedlog zaključka za tačku 2 i 3. dnevnog reda, kod pozivanja na član 21. Statuta i član 24. Odluke o izvršavanju Budžeta Općine Maglaj, kao nepotrebne.

Vijećnik Hajrudin Ferić, čisto formalno pogrešno se pozivalo na ove članove u članu 24. Odluke o izvršavanju je sasvim nešto drugo, nego što reguliše pitanje stipendija, to su prigovori čisto formalne prirode...

Predsjedavajuća OV, sugestije obrađivaču i Službi da uobzire sugestije Komisije za statutarna pitanje, poslovnik i propise. Nije bilo više zainteresovanih od vijećnika.

Azra Čakrama, ove tehničke greške iz preambule, nismo provjeravali vjerovatno se u međuvremenu pomjeralo u Odluci o izvršavanju Budžeta. Mi prihvatamo kao opravdano i ispraviti ćemo ih.

Odluka o dodjeli stipendija kao i Kriteriji danas su se našli u materijalu na sjednici OV, ali nakon održane javne rasprave i sve ovo što smo danas čuli na sjednici Općinskog vijeća najmanje djelimično ili u cijelosti bilo je iskazano i na javnoj raspravi koja je održana 22.2.2017. godine...

Vijećnik Elvir Vehabović, ja ovo što sam govorio rekao sam da za buduće godine bude ljepše i poštenije, nisam mislio da bilo šta od toga uđe u sadašnje kriterije. Znamo da je javna rasprava završena i prihvatamo ovo što jest ali za ubuduće da to poboljšamo.

Vijećnik Galijašević Firuz, predlažem da se ovaj moj prijedlog uvrsti u deficitarna zanimanja tekstilni inženjer. Redovno nam se javljaju susjedne općine koje traže takve kadrove. Moramo što prije uvrstiti da bi za sljedeću godinu mogli imati kvalitetan kadar.

Azra Čakrama, mi ne stipendiramo kadrove za druge općine, nego za svoje ono što su nam privredni subjekti tražili kao deficitarni kadar mi smo ih i stavili. Ja ne mislim da trebamo u našoj odluci da finansiramo kadrove za druge općine.

Vijećnik Galijašević Firuz, mi ne finansiramo druge općine, mi finansiramo naše studente koji moraju zbog obimnosti tržišta moraju tražiti posao i u Tešnju i Žepču i Zavidovićima, mi finansiramo naše studente a ne druge općine. Moraju tražiti posla i u drugim općinama.

Predsjedavajuća OV, stavljam na glasanje tačke prijedlog Odluke o raspodjeli sredstava za studentske stipendije za akademsku 2016/2017 godinu, kao i Kriterije za dodjelu stipendija redovnim studentima općine Maglaj za akademsku 2016/2017 godinu uvažavajući sugestije koje su iznesene za izradu materijala za neki naredni

period, uz prijedlog zaključka Komisije za statutarna pitanja, poslovnik i propise vezano za preambule ovih odluka. Predlažem na usvajanje

Z A K L J U Č A K

- 2.1. Usvaja se Odluka o raspodjeli sredstava za studentske stipendije za akademsku 2016/2017 godinu.
- 2.2. Usvajaju se Kriteriji za dodjelu stipendija redovnim studentima općine Maglaj za akademsku 2016/2017 godinu.
- 2.3. Usvaja se Zaključak komisije za statut, poslovnik i propise kojim se preporučuje brisanje pojedinih odredbi iz preambule Odluke kao bespotrebni
- 2.4. Zaključak Komisija za obrazovanje, nauku, kulturu i sport i Komisija za mlade i ravnopravnost polova OV Maglaj treba da blagovremeno preuzmu aktivnosti kako bi se do iduće godine sačinila kvalitetnija i sveobuhvatnija Odluka sa kriterijima, pri čemu je potrebno uobziriti i sugestije iznesene na sjednici a tiču se tretmana deficitarnih zanimanja – kao npr. inženjer tekstilne industrije, tekstilni pogonski inženjer i tretmana studenata „Bolonjskog ciklusa“ i svega ostalog što smatraju relevantnim.

Usvojeno jednoglasno

Predsjedavajuća OV, rekli smo prije nego se pristupilo glasanju da se vodi računa o svim sugestijama i zaključcima Komisija za naredni period.

Vijećnik Muhamed Hrnjić, ovo što je Firuz tražio ja sam imao drugačije tekstilni pogonski inženjer treba svaka općina i svaki grad. Ja tražim da se u maglajskoj srednjoj školi uvede tekstilna srednja škola dva odjeljenja. Svake godine izađe po 24 učenika i odmah po završetku škole svi su odmah bili primljeni na posao. Sad sam opet imao potrebu da izađem i da kažem tekstilni pogonski inženjer bi nam trebao.

Predsjedavajuća OV, dajem na glasanje da se u Kriterije kao deficitarna zanimanja uvede i tekstilni pogonski inženjer, pored navedenih u materijalu. Molim vas da se još jednom izjasnite.

Azra Čakrama, ne protivim se dodavanju i ovog zanimanja i struke kao deficitarne koja je potrebna i «HM promet», kao najvećoj firmi tekstilne industrije na našem lokalitetu. Ne mislim da bi bilo loše dodati i ovaj posao.

Mirsad Mahmutagić općinski načelnik, samo kratka intervencija ovdje bi trebalo sublimirati oba ova stava. Ovdje se radi o 2016/2017. godini dakle školskoj tu se radi o studentima koji pohađaju ovu i prošlu godinu. Činjenica je da pričamo i o kadrovima koji su deficitarni na području općine Maglaj i nije loše negdje napomenuti kroz zaključak da je deficitaran kadar na općini Maglaj i tekstilni pogonski inženjer, čisto zbog djece koja će se u julu mjesecu upisivati na fakultete da znaju da je taj fakultet poslije čega mogu odmah dobiti posao.

Predsjedavajuća OV, kao dio zaključka da je zanimanje tekstilni pogonski inženjer deficitarno zanimanje, a to se već duže vrijeme i kroz srednje škole provlači da je to interesantno zanimanje na općini Maglaj.

Pauza na prijedlog Kluba SDA

AD – 4. Prijedlog Odluke o pristupanju izradi Regulacionog plana “Groblje – Borik” u Maglaju;

Predsjedavajuća OV, prije nego počnemo sa razmatranjem tačaka od 4-9 ja bih iznijela i stav Komisije za statutarna pitanje, poslovnik i propise koji glasi :

Za tačke 4,5,6,7,8,9 dnevnog reda u preambuli prilikom pozivanja odnosno navođenja na akt, odluku, rješenje potrebno je pozivanje po pravnoj hijerarhiji tj. pozivanje na zakonske odredbe, a zatim druge niže zakonske odredbe po hijerarhiji. Isto tako u preambuli je navedeno pozivanje na član 18. ovlaštenja Općinskog vijeća, ili iste Zakona o prostornom planiranju što je obaveza prilikom donošenja ovakvih akata. Ukoliko je potrebno dati neko dodatno objašnjenje vezano za preambule navedenih akata predsjednik Komisije, gospodin Ferić je ovdje pa može i obrazložiti još o čemu se zapravo radi. Radi se samo o tome da pozivanje na odredbe nije bilo hijerarhijski prilikom donošenja ovakvih akata.

Fuad Hajrulahović, obrazložio prijedlog Odluke...

Dokument koji bi trebalo donijeti na Općinskom vijeću to je da pristupamo izradi Regulacionog plana «Groblje Borik» u Maglaju. Imali smo puno dilema, Komisija je raspravljala, bilo je tu još i drugih sastanaka po pitanju NVO i u konačnom obilasku Služba sa predstavnicima, Načelnikom i Predsjedavajućom našli smo tu jednu lokaciju sa kojom bi trebali biti svi zadovoljni. Služba je pripremila Odluku, i želim naglasiti da parcela 2698, ona u ovom prijedlogu Odluke trebala bi biti izostavljena. Lokacija budućeg groblja bi bila samo na parceli k.č.br. 2697 površine nekih 66 duluma, znači radilo bi se o jednom dijelu te k.č. Na zahtjev NVO i boračkih udruženja do sad su se usaglasili da se ponuđena lokacija koju ste imali u prijedlogu za nekih 100-200 metara pomjeri i da onda budu svi u konačnici zadovoljni kako bi išli u proceduru. Pravni osnov za izmjenu Regulacionog plana «Borik» sadržan je u odredbama člana 13., 37., 42., 45., 46., 47. i 48., Zakona o prostornom uređenju i građenju Ze- do

kantona („Službene novine Ze-do kantona „ broj: 01/14), kojim je definisan postupak pristupanja izrade, donošenja, i sadržaj dokumenta Regulacionog plana općine, i prema kojem je Općinsko vijeće nadležno za donošenje Odluke o pristupanju izrade dokumenta prostornog uređenja. Ovdje se ne može primijeniti skraćeni postupak, tako da ovaj prijedlog odluke reguliran u redovnom postupku, a redovan postupak znači javni uvid i javnu raspravu... Za buduće gradsko groblje bilo bi uobzireno oko 10.000 m² ili jedan hektar, što podrazumijeva i pristupnu saobraćajnicu i onaj dio koji je neupotrebljiv za gradsko groblje.

Vijećnik Muhamed Hrnjić, Komisija za privredu, prostorno uređenje, urbanizam i zaštitu okoliša održala je sastanak 27.2.2017. godine sastanak. Komisija predlaže Općinskom vijeću da se donese Odluke o pristupanju izradi Regulacionog plana «Groblje – Borik» Maglaj.

Vijećnik Svjetlana Zamboni, drago mi je da konačno raspravljamo o ovom vrlo važnom pitanju.

Zahvaljujem se općinskom načelniku što je prepoznao važnost rješavanja ovog civilizacijskog pitanja. Građana radi imam obavezu da naglasim da se već od mjeseca novembra, odmah po preuzimanju dužnosti općinskog načelnika i konstituisanjem novog saziva općinskog vijeća svakodnevno radilo na iznalasku rješenja za pitanje groblja u Maglaju i od strane ON i OV.

Svi mi ovdje svjesni smo da se ne smiju ponoviti neželjeni događaji vezani za ukop naših građana i nadam se svi smo i voljni da se ovo pitanje riješi nakon toliko godina.

Ono što usvajanju ove odluke ide u prilog jeste i činjenica da je zahvat Podborika i Prostornim planom svojom namjenom opredjeljen kao groblje te ne postoje smetnje da se ide u detaljnu izradu planske dokumentacije tj. regulacionog plana.

S tim u vezi predlažem i zaključak da se u izradi Regulacionog plana zahtijevaju najkraći mogući rokovi u skladu sa propisima od strane Nosioca izrade Regulacionog plana te da se tender/poziv objavi već naredne sedmice.

Vijećnik Hajrudin Ferić, mišljenje DF je i osjećam zadovoljstvo što učestvujem u donošenju ovako krupne odluke koja, svi se nadamo i učinit ćemo sve da je dovedemo do krajnje realizacije u što kraćem roku... Maglaj i građani Maglaja zaslužuju da se ovaj problem i ovo pitanje konačno riješi. Mi krećemo u konačno rješavanje najprije jednog komunalnog problema i to treba tako da tretiramo ...

Predlažem Općinskom načelniku i šefu Službe, jer treba prethodna suglasnost od Ministarstva, sugerišem da pokušate da zakažete sastanak sa Premijerom kako ne bi eventualno bilo kakvih problema ili političkih ili bilo koje druge vrste. Siguran sam da neće biti, ali nije na odmet da zatražite jedan sastanak kako ne bi dolazilo do nekakvih problema u realizaciji ove odluke.

Problem koji se pojavio i da izvučemo pouku iz svega toga kada je u pitanju donošenje izmjene Regulacionog plana Čakalovac. Tamo gdje se ne provede procedura kako treba uvijek su neki problemi i uvijek se moramo sjetiti toga da su nekako sve procedure vođene kako ne treba i kad je u pitanju Jablanica Greenston, i kad je u pitanju Kosova i vađenje kamena i dobrim dijelom kad je u pitanju Domislica, a to se desilo i kad je u pitanju groblje Čakalovac...

Predlažem da Načelnik odredi radnu grupu koja će paralelno raditi Odluku o pogrebnoj djelatnosti u koju će biti uključen predstavnik Službe, komunalni inspektor, predstavnik KJD i svi drugi za koje smatra da je potrebno da se ta odluka o pogrebnoj djelatnosti kvalitetno donese...

Vijećnik Nedžad Lokmić, gospođa Predsjedavajuća je već iznijela stav Kluba i ja osobno podržavam ovu odluku o izmjeni Regulacionog plana ...

Gospodin Hajrulahović je objasnio da se radi o 66 duluma, odnosno dio koji se opredjeljuje za ovu namjenu...

Znamo da ima problema i u ostalim mjesnim zajednicama oko ukupnih mjesta i u tom pogledu je za svaku pohvalu ova Odluka o izmjeni Regulacionog plana...

Vijećnik Safet Jašić, Klub vijećnika SDA po pitanju prijedloga Odluke o pristupanju izrade Regulacionog plana, «Groblje Borik» u Maglaju je suzdržan po osnovu prijedloga odluke, zato što ne znamo kakav je stav boračkih udruženja.

Mirsad Mahmutagić općinski načelnik, drago mi je da je cjelokupno Općinsko vijeće podržalo ovakvu jednu odluku. Prije nekoliko dana imao sam sastanak u Općinu su dolazili glavni imam Medžlisa islamske zajednice, predstavnici udruženja CZR i predsjednica PŠ i PB, razgovarali smo o ovim temama i vrlo korektno, tako da niko ni jednog trenutka nije rekao bilo što negativno oko rješavanja ovog problema. Nakon toga smo izašli na teren zajedno i poznate su lokacije gradskog groblja. Obzirom da danas nisu prisutni na sjednici Općinskog vijeća smatram da su zadovoljni predloženim rješenjem.

Fuad Hajrulahović, vezano za izlaganje dopredsjedavajućeg djelimično se slažem, međutim Općinsko vijeće je donijelo te odluke, pristupanju djelimične izmjene Reg. plana Čakalovac odnosno Bijela Ploča ... problem je nastao kada je Odluka o upravljanju grobljem trebala ići na javnu raspravu ... Što se tiče ovih udruženja mi smo izašli na teren zajedno i oni su zadovoljni sa tom lokacijom.

Vijećnik Hajrudin Ferić, vijećnicima je tada dostavljen papir u kome je zamjenik predsjednika iz Mjesne zajednice dao saglasnost za izmjenu Reg. plana, mimo Savjeta i na osnovu toga se Općinsko vijeće opredjeljivalo. Ja govorim o proceduri i moje mišljenje je da su tu preko koljena nešto prelomilo da bi kasnije izazvalo ovakve reakcije kakve su bile...

Vijećnik Safet Jašić, Općinsko vijeće je institucija ...

Tražim pauzu od 5 minuta da se usaglasimo

Mirsad Mahmutagić općinski načelnik, ...

Pauza na zahtjev Kluba SDA

Vijećnik Safet Jašić, kako je Načelnik obavio razgovor sa predstavnicima udruženja i predstavnicima Medžlisa IZ i bio sa njima na terenu, nemamo mi tu šta, mi ćemo podržati ovu Odluku...

Predsjedavajuća OV, zaključujem raspravu

Kratka pauza za Klub SDP-a

Predsjedavajuća OV, zaključujem raspravu i stavljam na glasanje

Z A K L J U Č A K

- 4.1. Usvaja se Odluka o pristupanju izradi Regulacionog plana „Groblje –Borik“ u Maglaju sa izmjenom u nabranjanju parcela. U usvojenom tekstu izostavlja se parcela k.č. 2698.
- 4.2. Nalaže se Općinskom načelniku i šefu Službe za urbanizam, stambeno-komunalne i imovinsko pravne poslove, da iniciraju u što skorije vrijeme radni sastanak sa Premijerom ZDK i ministrom za šumarstvo, gdje bi upoznali iste o važnosti rješavanja komunalnog problema za građane Općine Maglaj.
- 4.3. Nalaže se Općinskom načelniku da formira ekspertni tim u čijem će sastavu biti predstavnik Općinske Službe, KJD Maglaj i komunalni inspektor, kao i drugi po procjeni načelnika, da izrade cjelovitu Odluku o pogrebnoj djelatnosti do konačnog usvajanja Regulacionog plana „Borik“ Maglaj.
- 4.4. Prihvata se sugestija Komisije za statutarna pitanja, poslovnik i propise, da se u preambuli Oduke navede prvo „stariji“ pravni akt- odnosno članovi zakona, pa onda akti općinskog značaja.
- 4.5. Da se u izradi Regulacionog plana zahtijevaju najkraći mogući rokovi u skladu sa propisima od strane nosioca izrade Regulacionog plana.
- 4.6. Da se poziv objavi već naredne sedmice.

Usvojeno jednoglasno

AD – 5. Prijedlog Odluke o prosječnoj konačnoj građevinskoj cijeni 1m2 korisne stambene površine;

Predsjedavajuća OV, otvaram raspravu

Fuad Hajrulahović, zakonska obaveza Općinskog vijeća je do 31. marta tekuće godine donijeti Odluku o prosječnoj konačnoj građevinskoj cijeni 1 m2 korisne stambene površine...

Javna rasprava je održana 22.2.2017. godine u 13 sati i bio je vrlo mali odaziv... Na toj raspravi bilo je više konstruktivnih prijedloga i sugestija i rečeno je da bi svaka tri mjeseca se pratile promjene rasta i smanjenja cijena u građevinarstvu kako bi se i odluka korigovala. Također je zaključeno da se do slijedeće sjednice pripremi jedan objekat od 500 m2 i dostaviti građevinskim firmama gdje će oni napraviti stvarnu cijenu. Zaključeno je također da se donese plan utroška sredstava prikupljenih po osnovu obračuna za rentu i pogodnost...

Vijećnik Muhamed Hrnjić, Komisija je razmatrala prijedlog ove Odluke i predlažemo Općinskom vijeću da se donese Odluka o prosječnoj građevinskoj cijeni 1 m2 korisne stambene površine. Komisija predlaže da se utvrdi cijena od 700,00 KM sa PDV. Komisija predlaže da se svaka tri mjeseca vrši provjera i ako postoje uslovi da se cijene koriguju. Komisija predlaže da se sačini plan utroška tih prikupljenih sredstava. Komisija predlaže da se naredne sjednice OV pripremi odluka sa korekcijom ukoliko bude bilo potrebe.

Vijećnik Mirsad Bežić, Bez obzira na naš stav po pitanju Komisija, Klub vijećnika SDA predlaže da se prihvati prijedlog Odluke kao u materijalu, odnosno da cijena 1 m2 korisne stambene površine iznosi 700,00 KM/m2.

Predsjedavajuća OV, zaključujem raspravu i dajem na glasanje

Z A K L J U Č A K

- 5.1. Usvaja se Odluka o prosječnoj građevinskoj cijene 1m2 korisne stambene površine kao u prijedlogu (700,00 KM sa PDV).
- 5.2. Prihvata se sugestija Komisije za statutarna pitanja, poslovnik i propise, da se u preambuli Oduke navede prvo „stariji“ pravni akt- odnosno članovi zakona, pa onda akti općinskog značaja.

5.3. Zadužuje se nadležna Služba da prati kretanje cijena na tržištu po metodologiji propisanoj Zakonom, da revalorizuje iznos cijene svaka tri mjeseca i po potrebi predloži izmjene cijene Općinskom Vijeću Maglaj.

Usvojeno jednoglasno

AD – 6. Prijedlog Odluke o kriterijima za prodaju građevinskog zemljišta neposrednom pogodbom;

Fuad Hajrulahović, na prošloj sjednici ste donijeli zaključak u kojem se zadužuje Služba da pripremi Odluku o kriterijima za prodaju građevinskog zemljišta neposrednom pogodbom sa određenim sugestijama da se u prijedlog Odluke ugrade, to su pogodnost zemljišta, kvalitet zemljišta i dobit investitora uz određena ulaganja. Zakonom o stvarnim pravima je definisano ... Mi smo okušali u saradnji sa susjednim općinama pripremiti jedan prijedlog odluke i ovaj prijedlog odluke definisano je ko može ići u neposrednu pogodbu, isto tako definisano je odstupanje za izgrađeno i neizgrađeno zemljišta. U članu 8. Odluke o građevinskom zemljištu koja je na snazi u Općini Maglaj mi imamo podijeljeno građevinsko zemljište u šest zona, tako da se te zone uklapaju po površini i po položaju ... Ovo je jedna okvirna Odluka koja će biti povod za utvrđivanje polaznih cijena što ne znači da će se neke cijene i neke parcele koje budu išle neposrednom pogodbom da će se postići i veća cijena...

Vijećnik Muhamed Hrnjić, Komisija je raspravljala i ovu tačku dnevnog reda. Komisija predlaže Općinskom vijeću da se donese Odluka.

Predsjedavajuća OV, otvaram raspravu

Vijećnik Nedžad Alispahić, Bez obzira na stav Kluba SDA po pitanju Komisija, Klub vijećnika SDA prihvata prijedlog Odluke o kriterijima za prodaju građevinskog zemljišta neposrednom pogodbom.

Fuad Hajrulahović, vezano za šest zona, u zadnjoj izmjeni Regulacionog plana Centar – sjeverni dio došlo je do korekcije ulice Aleje Ljiljana, a komisija je isto predložila da se koriguje da se utvrdi granica između II i III zone u sjevernom dijelu grada u ulici Aleja Ljiljana od T-1 - ide osovnom ulice do kružnog toka. Predlažem da se izvrši korekcija odnosno linija razgraničenja u zonama bude sa ovom saobraćajnicom.

Vijećnik Hajrudin Ferić, dobro je što imamo ovaj prijedlog Odluke i smatramo da je ovo izuzetno važna i značajna odluka. Kada smo i obrazložili da se donese jedna vrsta ovakvog akta da se uvede malo sistematičnosti, reda pa i transparentnosti u ovoj vrsti poslova. Želim predložiti da ova odluka ide u formi nacrt. Zato što je od početka treće sjednice OV do danas bilo svega 16 radnih dana. U tih 16 radnih dana potpuno nova odluka i oblast koja je nova, kompleksa ipak je malo vremena da se napravi jedna dobra, kvalitetna i stabilna odluka. Počev od naziva odluke...itd.

Predlažemo da Odluka ide u nacrt, ali opet kako vijeće odluči.

Pauza za Kolegija OV

Predsjedavajuća OV, stav Kolegija je da se Odluka o kriterijima za prodaju građevinskog zemljišta neposrednom pogodbom vraća na doradu, a rok za doradu ove odluke je 60 dana. Predlažem

Z A K L J U Č A K

6.1. Vraća se Prijedlog Odluke o kriterijima za prodaju građevinskog zemljišta neposrednom pogodbom na doradu kako bi se u roku od 60 dana sačinila preciznija i sveobuhvatnija Odluka te predložila Općinskom vijeću na usvajanje.

Usvojeno jednoglasno

AD – 7. Prijedlog zaključka na inicijativu MZ Kosova o vraćanju na snagu planske dokumentacije urbanistički red-urbanistički plan Kosova;

Vijećnik Hajrudin Ferić, predlažem Općinskom vijeću da ovo podijeli u dva akta, zaključak zaključkom, a Odluka Odlukom.

Fuad Hajrulahović, obrazloženje zaključka ... Jedan od zaključaka je bio da se održi javna rasprava u Mjesnoj zajednici Kosova sa svim zainteresovanim da se dođe do jednog jedinstvenog stava. Odziv je bio veliki radi se o prostoru 70,6 hektara. Zaključeno je na osnovu diskusija, da se ide sa inicijativom da se zaključak OV u kome je doneseno odnosno zaključeno da se stavi van snage Regulacioni plan n/m Kosova, da se stavi zaključak van snage i da se novim zaključkom vrati Urbanistički plan Kosove, a da se ljudima koji su nezadovoljni da mogućnost da podnesu inicijativu za djelimičnu izmjenu Regulacionog plana, baš tamo gdje su oni nezadovoljni. Iz diskusije se moglo zaključiti da su nezadovoljni četiri vlasnika zato što su preko njihovih parcela predviđene saobraćajnice. Zaključak je bio da se predloži OV da zaključkom kojim je stavljen van snage Regulacionog plana n/m Kosova da se taj isti ponovo vrati uz mogućnost ljudima da ostvare svoja prava kroz djelimične izmjene putem Općinskog vijeća.

Vijećnik Muhamed Hrnjić, Komisija predlaže Općinskom vijeću da se usvoji predloženi Zaključak. Komisija sugerira da se omogući nezadovoljnim licima, pokretanje djelimične izmjene Regulacionog plana po zahtjevu investitora.

Vijećnik Adis Abdurahmanović, Klub vijećnika SDA prihvata prijedlog zaključaka na inicijativu MZ Kosova o vraćanju na snagu planske dokumentacije urbanističkog reda – urbanističkog plana Kosova.

Vijećnik Hajrudin Ferić, Komisija za statutarna pitanja, poslovnik i propise je sugerisala da se zaključkom stavi van snage zaključak, a da se Odlukom stavi van snage Odluka. To su dvije različite stvari i različite procedure, formalne prirode. Donosi se Odluka o ponovnoj primjeni urbanističkog reda, urbanističkog plana Kosova. To znači da mi vraćamo, kad donesemo ovo donosimo odluku da se ponovo primjenjuje odluka o izmjeni... Ja koliko imam informacije to je već urađeno 2015. godine. Objavljeno u (Službenim novinama Općine Maglaj”2/15), ali bih volio da to malo vidimo šta je o čemu se tu radi, jer ako je to tako i ako sam u pravu onda bi mi trebali danas da donesemo samo zaključak.

Mora postojati stvarna nadležnost za donošenje određenih akata.

Ako treba pauza da je napravimo i da vidimo, da usaglasimo.

Pauza za deset minuta za usaglašavanje.

Vijećnik Hajrudin Ferić, samo u članu II prijedloga Zaključka da se kaže donosi se zaključak o ponovnoj primjeni Odluke o izmjeni i dopuni urbanističkog reda...

Predsjedavajuća OV, izmjena bi ovog prijedloga bila samo u članu II koji glasi : Donosi se zaključak o ponovnoj primjeni Odluke o izmjeni i dopuni urbanističkog reda, urbanistički plan Kosova broj: 02-05-1-1296/12 od 12.04.2012.godine.

Zaključujem raspravu i stavljam prijedlog na usvajanje

Z A K L J U Č A K

7.1. Usvaja se zaključak o vraćanju na snagu planske dokumentacije urbanistički red – urbanistički plan Kosova

7.2. U članu II Zaključka umjesto riječi „Donosi se Odluka o ponovnoj primjeni“, treba da stoji „Ovim Zaključkom se ponovo primjenjuju odredbe“. Ostali tekst ostaje nepromijenjen.

Usvojeno jednoglasno

AD – 8. Prijedlog Odluke o usvajanju izmjene Regulacionog plana “Misurići” (zahtjev “HM promet” d.o.o. Maglaj).

Fuad Hajrulahović, pravni osnov za donošenje ovog prijedloga Odluke je zaključak Općinskog vijeća koji je 12.05.2016.godine Vijeće je donijelo Odluku o pristupanju izmjene Regulacionog plana Misurići ...

Provedena je procedura u skladu sa zakonom.

Vijećnik Mustafa Buljubašić, Komisija je razmatrala prijedlog ove Odluke, predlaže da se usvoji Odluka o usvajanju izmjene Regulacionog plana Misurići po zahtjevu “HM promet” d.o.o. Maglaj

Vijećnik Hajrudin Ferić, ...

U aprilu 2014. godine općinsko vijeće ušlo je u određene radnje kako bi se pomoglo firmi «HM promet» da realizuje ovaj projekat. Poslije toga je negdje u junu mjesecu potpisan jedan sporazum gdje su bili supotpisnici Vlada ZDK, zatim Općina Maglaj, Federalni zavod za zapošljavanje, USAID, SIDA, HM i Schmidt iz Njemačke, gdje je ukupno 1.650.000 KM izdvojeno, odnosno planirano da se izdvoji sredstava za zapošljavanje 456 radnika. Osim ovih projekata bilo je još projekata, fondova itd. od strane i federalnog, kantonalnog i općinskog nivoa. Ovo je jako važan projekat za općinu Maglaj. Važan je sa aspekta podrške privrednicima, važan je sa aspekta i ono što mi treba da znamo i izvlačimo pouke iz ovakvih projekata, gdje to ima mogućnosti da se eventualno te kočnice otklone kako bi se išlo što brže u realizaciju ovih projekata...

Mi u zvaničnim podacima sa Biroa nemamo još uvijek zvanično ovaj broj zaposlenih u ovoj firmi. Ja bih zamolio gospodina Hrnjića da nam svima kaže s kojim teškoćama i problemima se susreće njegova firma da se realizuje ovaj projekat i gdje to Općinsko vijeće nije učinilo, a moglo je i gdje treba u narednom periodu da nešto učini da se to na najbolji način realizuje taj projekat...

Žao mi je što nema Pravobranioca ovdje da nam kaže da otklonimo sve moguće dileme, komentare, sumnje itd. o ovom prijedlogu akta.

Ja znam da je ovo sve urađeno u skladu sa procedurama i zakonom. Ovo govorim samo zato što je u ovom materijalu u obrazloženju prilično zakukuljeno mišljenje Pravobranioca, mislim da nema nikakve potrebe da bude ovako zakukuljeno i zbog toga žao mi je što nema Pravobranioca.

Mi ćemo podržati ovaj prijedlog, ali bih zamolio gospodina Hrnjića da nam kaže...

Vijećnik Ermina Muminović, Klub vijećnika SDA predlaže da se usvoji prijedlog Odluke o usvajanju izmjene Regulacionog plana Misurići po zahtjevu «HM promet» d.o.o. Maglaj.

Vijećnik Muhamed Hrnjić, iznenađuje me pitanje gospodina Fermića. Za slijedeću sjednicu pripremit ću sve da ne bih sad napamet govorio...Sva sredstva do sad su opravdana...

Vijećnik Safet Jašić, Jednoglasno je donesena odluka 12.5.2016. godine da se ide u skraćenom postupku i da se izađe u susret i sve u korist "HM promet". Ne moraš ti Muhamede ništa pripremati za slijedeću sjednicu. Svi smo mi ovdje bili za to i dalje je tako i trebamo ići naprijed a ne nazad.

Fuad Hajrulahović, Ovom izmjenom nije se posmatrao samo prostor firme HM, nego se posmatrao čitav prostor od M-17 i saobraćajnice, odnosno raskrsnice poslovne zone, tako da mi u tom prostoru imamo još dvije parcele. Za jednu parcelu je započeta gradnja. Zašto smo uključili pravobranioca, kod ove djelimične izmjene Regulacionog plana stav i mišljenje kad se radi o firmi HM to je čisto 1/1. Ne znam koliko imate kod sebe ove grafičke prikaze, tu ima i općinskog zemljišta i iz tog razloga smo tražili mišljenje Općinskog pravobranioca. Ona se uključila u postupku dodjele zemljišta...

Predsjedavajuća OV, zaključujem raspravu i predlažem na usvajanje

Z A K L J U Č A K

8.1. Usvaja se Odluka o usvajanju izmjena Regulacionog plana „Misurići“ (zahtjev „HM promet“ d.o.o. Maglaj) .

8.2. Prihvata se sugestija Komisije za statutarna pitanja, poslovnik i propise, da se u preambuli Oduke navede prvo „stariji“ pravni akt- odnosno članovi zakona, pa onda akti općinskog značaja.

Usvojeno sa 23 glasa za i 1 uzdržan glas Muhamed Hrnjić (SBB).

AD – 9. Prijedlog Odluke o usvajanju izmjene Regulacionog plana “Centar Maglaj-južni dio” (zahtjev Ljuca Adis, Sović Sanja i Bureau Amra);

Predsjedavajuća OV, otvaram raspravu

Vijećnik Hajrudin Fermić, od maja mjeseca do danas najjednostavniji, najčišći predmet evo rješava se sedam mjeseci. Da li zaista treba toliko vremena da prođe od zahtjeva do realizacije?

Fuad Hajrulahović, ovdje je najjednostavnije nešto, a obzirom da Služba nema pravo po zakonu vršiti korekcije ima pravo vršiti korekcije dimenzije objekata, ovdje se radilo o tome da su se morale vršiti korekcije građevinskih linija, to je bilo nešto minimalno. Radilo se o tome da je bio objekat 12 x 10, a radi se o objektu 12 x 12. Međutim, ta dva metra moralo se korigovati. Ono što je malo odužilo se jest odsutnost podnosioca zahtjeva jer sve troje žive van BiH...

Predsjedavajuća OV, zaključujem raspravu i predlažem na usvajanje

Z A K L J U Č A K

9.1. Usvaja se Odluka o usvajanju izmjene Regulacionog plana „Centar Maglaj-južni dio“ (zahtjev Ljuca Adis, Sović Sanja i Bureau Amra).

9.2. Prihvata se sugestija Komisije za statut, Poslovnik i propise, da se u preambuli Oduke navede prvo „stariji“ pravni akt- odnosno članovi zakona, pa onda akti općinskog značaja.

Usvojeno jednoglasno

AD –10. Rješenje o odbijanju zahtjeva Džino Petrol” d.o.o. Maglaj, za dodjelu neizgrađenog gradskog građevinskog zemljišta radi gradnje uz postojeću parcelu;

Vijećnik Edib Delić, Klub vijećnika SDA odbija prijedlog Rješenja kojim se odbija zahtjev firme «Džino-Petrol» d.o.o. Maglaj za dodjelu neizgrađenog gradskog zemljišta radi gradnje uz postojeću parcelu na kojoj je izrađena samouslužna autopraonica benzinske pumpe.

Predlažemo da nadležni općinski organ predloži Rješenje kako bi se udovoljilo zahtjevu «Džino-Petrol» d.o.o. Maglaj, a u interesu razvoja privrede, novih zapošljavanja, pogotovo imajući u vidu da ovoj parceli nalazi i jedan dio imovine u vlasništvu Islamske zajednice, te da se izmjeni Regulacioni plan i provedu sve druge procedure kako bi ovom zahtjevu bilo udovoljeno.

Vijećnik Muhamed Hrnjić, Komisija predlaže Općinskom vijeću da se usvoji Rješenje o odbijanju zahtjeva “Džino petrol” d.o.o. Maglaj za dodjelu neizgrađenog građevinskog zemljišta radi gradnje uz postojeću parcelu.

Komisija sugeriše Općinskom vijeću da se donese Odluka o prodaji parcele koja je na planu parcelacije označena sa brojem 72 površine 1216 m² u skladu sa zakonom po Regulacionom planu Centar Maglaj-južni dio. Komisija je stava da se ide na licitaciju i da se proda sve u komadu.

Vijećnik Hajrudin Ferić, ja nisam znao za zaključke Komisije za privredu, nekako su na fonu ovoga što ću i ja reći. Gledajući zahtjev vlasnika Džine, vidimo da je on u formalnoj proceduri sve kako bi trebalo da bude.

Međutim, u ovom obrazloženju pokazuje se nekakav čvrst stav ...

Možda da se u obrazloženju ili na neki drugim način da se pouči kako eventualno može da ostvari svoj interes i svoje pravo iz zahtjeva.

Vijećnik Edib Delić, ne bih se složio sa Ferićem da ljudi uđu u posjed i onda traže papire. Džino ima benzinsku pumpu, ima auto praonicu, prodavnicu, sve je čisto, zapošljava ljude. Mislim da bi ovo trebalo naći način da se uradi, ne znam kakva je procedura, ali on imao novac i može to da uradi uz poštivanje svih zakonskih propisa. Mi smo i do sada tamo gdje je trebalo išli u izmjene regulacionih planova. Ima rješenja samo treba vidjeti s čovjekom ...

Vijećnik Mirza Bradarić, firma o kojoj pričamo je «Džino petrol», a firma koja je već ranije spomenuta «Džino» je dole u Moševcu tako da su to dvije različite firme. Mi imamo zahtjev podnesen od firme «Džino petrol». Ja se dobro sjećam da tu benzinska prije nije bila. Bilo je zapušteno, zaraslo sad je to jedna lijepa slika ulaska u grad. Ja sam vidio ovo rješenje, pa sam shodno tome htio pitati čiji je prijedlog. Da li postoji ikakva mogućnost, da li postoji ikakvo rješenje kako bi čovjek mogao podnijeti zahtjev kako bi on to mogao riješiti. Interesuje me tamo kad dođemo do čitave parcele gdje su kamioni parkirani itd. Prijedlog da se ta zemlja proda u komadu itd. to je pitanje da li se zaista na toj čitavoj parceli riješeni imovinsko pravni odnosi? Ja sam dobio informaciju da bez obzira na prodaju zemlje problem bi mogao se pojaviti, jer postoje neki ljudi koji žive u Americi. Ovo sam čuo i zato pitam. Da se ne bi desio problem i da se ne pojave problemi kada mi to prodamo.

Fuad Hajrulahović, neki su bili u sastavu prethodnih vijeća. Mi smo firmi «Džino petrol» u dva navrata dodijeli zemljište, odnosno Vijeće je prodalo dodatne količine zemljišta, lijevo i desno. Radi se o parceli koja ima oko 1200 m², na kojoj je predviđena izgradnja tri lamele, P+ 1 i P+ 2 i to čini kao jednu cjelinu na Regulacionom planu. Shodno zakonu o stvarnim pravima, vlasnik ovog zemljišta onako kako sad stoji ne ide. To može ići samo prodaja zemljišta putem licitacije... Pokušalo se obrazložiti, međutim u svim tim razgovorima gospodin Džino nije htio ni potpisati zapisnik.

Što se tiče imovinskih odnosa ima jedan dio zemljišta koji se vodi na Islamskoj zajednici, tu se radi o cca 120 m² i da su vođeni pregovori da Općina Maglaj ustupi za izgradnju vanjskog uređenja gradske džamije nekih 120 m² zemljišta, a zauzvrat da se tih 120 m² gore pripoji Općini, tako da to nije uopšte nerješivo.

Što se tiče samog objekta, pravni vlasnik više ne postoji nad tim objektima, IZ je vlasnik zemljišta, a vlasnik objekta više ne postoji. Firma «Zovko» koja je ugašena i koja ne postoji. Tu su stanovali samci 3-4 međutim više od 20 godina poslije rata niko se nije pojavio da ostvari nikakvo ni stanarsko prvo ...

Na vama je da odlučite kako ćete da li ćete ići u parcelaciju tri manje ili da ostane kao jedna, mi nismo htjeli to da predložimo...

Interes Vijeća je bio da se konačno taj dio zemljišta proda, da se konačno privede namjeni. Kod donošenja odluke o prodaji Vijeće bi se moralo izjasniti šta je konkretna namjena tog prostora.

Općinski načelnik, skoro da i nema potrebe izaći, nakon što je gospodin Hajrulahović objasnio. To je sva suština koju ja hoću ponoviti. Mi smo kao vijeće u dva navrata prodavali dio zemljišta «Džini»... Ovdje se radi o jednoj parceli koja je vlasništvo Općine u površini od 1250 m², i da ta parcela može ići u prodaju onako kako to donese Vijeće. Kako će to ići odlučit će Vijeće... Mora se proći kompletna procedura. Predlažem da riješimo ovaj odnos sa Islamskom zajednicom i da riješimo tu parcelu za prodaju i da se privede namjeni onako kako je i predviđeno.

Predsjedavajuća OV, zaključujem raspravu i predlažem na usvajanje

Pojedinačno ćemo se izjašnjavati po iznesenim prijedlozima, stavljam prvi prijedlog na glasanje Rješenje o odbijanju zahtjeva "Džino petrol"

Glasalo je 13 za - Svjetlana Zamboni, Nedžad Lokmić, Mirza Bradarić, Armin Hrnjić, Anida Šahman, Irena Herceg, Firuz Galijašević (SDP), Hajrudin Ferić, Fikret Delić (DF), Muhamed Hrnjić, Mustafa Bešić (SBB), Mustafa Buljubašić (SP/U), Elvir Vehabović (SBIH).

Glasalo je 11 protiv - Adis Abdurahmanović, Nedžad Alispahić, Selma Avdić, Kanita Bašić, Mirsad Bejić, Benjamin Čičkušić, Safet Jašić, Edina Jašić, Ermina Muminović, Dženita Smajlović (SDA).

Stavljam na glasanje drugi prijedlog zaključka iznesen od strane predsjednika Komisije za privredu gospodina Hrnjić Muhameda, vezano za prodaju putem licitacije, što je bilo slično prijedlogu dopredsjedavajućeg i gospodina Načelnika, a i gospodin Delić je bio na tom fonu da se gospodinu Džini izađe u susret na određeni način, da se prilikom dostavljanja ovog rješenja dostavi i pouka kako može ostvariti svoja prava po pitanju ove parcele.

Usvojeno jednoglasno.

Konstatujem da su usvojeni zaključci

Z A K L J U Č A K

- 10.1. Usvaja se Rješenje o odbijanju zahtjeva Džino Petrol d.o.o. Maglaj za dodjelu neizgrađenog gradskog građevinskog zemljišta radi gradnje uz postojeću parcelu.**
- 10.2. Zadužuje se Služba za urbanizam da uz Rješenja detaljnije obrazloži podnosiocu zahtjeva sve zakonske mogućnosti koje su mu na raspolaganju, kako bi eventualno ostvario svoj interes iz zahtjeva.**
- 10.3. Prihvata se sugestija Komisije za statut, poslovnik i propise, da se u preambuli Oduke navede prvo „stariji“ pravni akt- odnosno članovi zakona, pa onda akti općinskog značaja.**

Pauza od pola sata

AD – 11. Prijedlog Odluke o pristupanju izmjenama i dopunama Poslovnika o radu OV;

Vijećnik Fermić Hajrudin, Kao predsjednik Komisije za statutarna pitanja, poslovnik i propise izlazim da obrazložim prijedlog ove Odluke.

Kad smo usvajali Program rada OV za 2017. godinu jedna od predloženih stavki je i donošenje Odluke o pristupanju izmjenama i dopunama Poslovnika o radu OV Maglaj. Komisija za statutarna pitanja, ... stavila je i svoj popis u Program rada i aktivnosti ... predložili smo i OV je donijelo zaključak da donese Odluka o izmjenama i dopunama Poslovnika o radu OV sa slijedećim obrazloženjima...

Donošenjem ovakve odluke mi zaista otvaramo raspravu šta je ovdje potrebno i šta ima težinu i potrebu da se mijenja.

Ukoliko Općinsko vijeće donese Odluku o pristupanju izmjenama, onda će tijelo koje se zaduži danas, sačiniti jedan nacrt prijedloga izmjena i dostaviti na Vijeće, pa bi onda u formi javne rasprave i konsultacija u nekom narednom periodu došlo do jednog kvalitetnog teksta Poslovnika o radu.

Naš je prijedlog da nosilac aktivnosti bude Komisija za statutarna pitanja, poslovnik i propise uz stručnu i tehničku pomoć predstavnika Službi, organa uprave koje će odrediti Načelnik općine Maglaj.

Predsjedavajuća OV, otvaram raspravu

Vijećnik Elvir Vehabović, u ranijem periodu sam imenovan za predsjednika Zdravstvenog savjeta, a mene niko nije ni konsultovao ni pitao. To nikad nije ni zaživjelo...

Vijećnik Safet Jašić, dopredsjedavajući je puno toga nabacao nisam ga mogao ni pratiti što je sve govorio.

Tražim pauzu za Klub

Vijećnica Selma Avdić, Klub vijećnika SDA smatra da su materijali koji su dobili po ovom pitanju prijedlog Odluke o pristupanju izmjenama i dopunama Poslovnika o radu Općinskog vijeća došli prekasno da isti nismo imali da analizirano, te iz tog razloga smatramo da ovu tačku treba skinuti s dnevnog reda i za narednu sjednicu poslati svim klubovima vijećnika materijale, kako bi se mogao zauzeti kvalitetan stav i donijeti kvalitetan zaključak.

Predsjedavajuća OV, zaključujem raspravu i predlažem na usvajanje

Z A K L J U Č A K

- 11.1. Usvaja se Odluka o pristupanju izmjenama i dopunama Poslovnika o radu OV Maglaj.**
- 11.2. Zadužuje se Komisije za statutarna pitanja, poslovnik i propise, da uz stručnu i tehničku pomoć predstavnika organa uprave, koje odredi Općinski načelnik, uradi tekst Nacrta Odluke o izmjenama i dopunama Poslovnika o radu OV.**

Glasalo je 13 za - Svjetlana Zamboni, Nedžad Lokmić, Mirza Bradarić, Armin Hrnjić, Anida Šahman, Irena Herceg, Firuz Galijašević (SDP), Hajrudin Fermić, Fikret Delić (DF), Muhamed Hrnjić, Mustafa Bešić (SBB), Mustafa Buljubašić (SP/U), Elvir Vehabović (SBiH).

Glasalo je 11 uzdržani - Adis Abdurahmanović, Nedžad Alispahić, Selma Avdić, Kanita Bašić, Mirsad Bejić, Benjamin Čičkušić, Safet Jašić, Edina Jašić, Ermina Muminović, Dženita Smajlović (SDA).

AD –12. a) Izvještaj o radu komunalno-sanitarno-vodoprivrednog inspektora za period 1.1. –

31.12.2016. godine;

b) Program rada za 2017. godinu;

Vijećnica Irena Herceg, Izvještaj o radu komunalno-sanitarno-vodoprivrednog inspektora je vrlo jasan. Ono što je zabrinjavajuće i nedopustivo u ovom materijalu je nepostojanje općih uredbi a koje proističu iz važećih zakona. Potrebno je donošenje i usklađivanje na OV novih odluka onako kako stoji u materijalu ...

S obzirom da je na strani 5. napisano da inspekcija radi po starim zakonima SFRJ smatramo da je potrebno dati inicijativu za donošenje zakona u toj oblasti na kantonalnom nivou.

Ukoliko se uzme Program rada OV može se vidjeti da je većina ovih nedostajućih odluka predviđena Programom rada OV u određenom periodu pa stoga i sugestije OV ukoliko je potrebne neke od tih odluka donijeti u što kraćem roku.

S obzirom da je navedeno da je izdato 35 rješenja i izdato 8 trajnih naloga, izrečeno novčanih kazni u iznosu od 5.100 KM, zanima me koliko je od ove cifre i naplaćeno.

Vijećnik Benjamin Čičkušić, Klub vijećnika SDA prihvata Izvještaj o radu komunalno-sanitarno-vodoprivrednog inspektora za period 1.1. – 31.12.2016. godine, kao i Program rada za 2017. godinu.

Vijećnik Hajrudin Ferić, mi ćemo prihvatiti Izvještaj i Program rada komunalno-sanitarnog-vodoprivrednog inspektora, samo uz par nekih naznaka i pitanja na koja bi voljeli da inspektorica odgovori.

Naime, sve ono što se dešavalo u proteklih 10 godina, ima ovdje ljudi koji nemaju dovoljno informacija kako je to bilo. Općina Maglaj je od 2006. do 2011. godine nije imala ni jednog jedinog inspektora i ne znam da li smo bili jedina, ali svakako Općina koja je bila na stubu srama zbog toga iako su i tada važeći zakoni, a pogotovo ovi današnji nitalagali da postoji inspekcija u određenim oblastima...

Razumijemo teškoće sa kojima se susreću inspektori, i zahtijevamo, tražimo, molimo da u periodu kad se bude rješavalo po novoj sistematizaciji organa uprave da se obavezno prvo razmisli da li objektivno dva inspektora mogu da rade 6 referata, a svakako i obavezno da bude najmanje 1, a po mogućnosti 2 eko policajca sa svojim nadležnostima. Mislim da bi im jako puno pomoglo ne samo u gradu i prigradskim naseljima, nego i mjestima koji su malo udaljeniji.

Vezano za Zakon o zaštiti od buke, vjerujte to je problem koji mogu da riješe i nadležna služba, prije svega inspekcije i jedna i druga a i Stanica javne bezbjednosti. Ne trebam posebno objašnjavati koje su to tzv. zone buke koje po zakonu moraju da budu regulisane na mapama. Kako i na koji način se izdaju odobrenja za rad itd. ali po tom pitanju niko ništa ne radi.

Sugerišem da se to pitanje što prije riješi, ne samo buku, muziku uživo i sve ono drugo što ide uz to. To je jedna zamjerka kad je u pitanju i izvještaj i program rada komunalnog inspektora.

Treće je svakako i pitanje regulisanje, donošenje pravnih propisa. Nažalost vi niste poslali u Program rada OV šta je to što treba da se donese.

Merima Mahmutović, dala odgovore, trudila sam se da obuhvatim sve ono najglavnije sa čime se susreće naša općina...

Neću ponavljati pravne akte koje bi trebalo donijeti...

Što se tiče jačine zvuka, nije tačno da inspekcija ništa ne preduzima, već dvije godine se i ja borim i radi se na tome...

Niti jedan od ugostiteljskih objekata ne ispunjava uslove, niti imaju zvučnu izolaciju objekta, niti mjerač jačine zvuka...

Koristimo Zakon o javnom redu i miru i putem Policijske stanice pokušavamo djelovati na terenu...

Vezano za prekršajne naloge od 5.100,00 KM, uplaćeno je 2.700,00 KM. Moguće je da je u međuvremenu još nešto uplaćeno...

Predsjedavajuća OV, zaključujem raspravu i predlažem na usvajanje

Z A K L J U Č A K

12.1. a) Usvaja se Izvještaj za period 1.1.2016.-31.12.2016. godinu.

12.2. b) Usvaja se Programa rada za 2017. godinu komunalno-sanitarno-vodoprivrednog inspektora , te sugeriše da u realizaciji programa imaju u vidu iznesene sugestije i prijedloge vijećnika, vezane za usklađivanje zakona i propisa koje u svom radu koriste inspekcije (tj. da pokrenu postupke za donošenje novih, odnosno usklađivanje postojećih propisa).

Usvojeno jednoglasno

AD – 13. a) Godišnji Izvještaj o radu urbanističko-građevinskog i putnog inspektora za period 1.1. – 31.12.2016. godine;

b) Plan rada za 2017. godinu;

Predsjedavajuća OV, otvaram raspravu pod a) i pod b). Da li ima potrebe da se predlagač obrati?

Vijećnik Benjamin Čičkušić, Klub vijećnika SDA prihvata Izvještaj o radu urbanističko-građevinskog i putnog inspektora za period 1.1. – 31.12.2016. godine, usvaja i Program rada za 2017. godinu.

Vijećnik Mirza Bradarić, Klub SDP-a će prihvatiti i Izvještaj i Program rada za 2017. godinu. Što se tiče Izvještaja za 2016. godinu smatramo da ovaj Izvještaj je korektno odrađen. Navest ću par primjedbi.

Konkretno već su prethodnici spomenuli Plan rada Općinskog vijeća. Žao mi je što niste pokušali usuglasiti svoj Plan rada za 2017. godinu iz jednog razloga što bi automatski olakšali i sebi i nama kao Vijeću. U okviru Plana rada OV mogli ste neke svoje tačke pokušati uvrstiti i usuglasiti. Drugi prijedlog da inspektor podnese nekakve inicijative Općinskom vijeću koje bismo mogli uputi prema višim organima vlasti iz jednog prostora razloga pošto ste ovdje u par navrata naveli da neke zakonske odluke nisu mogle biti provedene iz razloga što ove odluke nisu usklađene sa kantonalnim odlukama, federalnim odlukama itd. Ako imate kakav prijedlog inicijativa, ako Vijeće može prosljediti prema višim organima vlasti stojimo na raspolaganju kako bismo olakšali i vama i građanima općine Maglaj ove stvari...

Vezano za naplatu bilo je prekršajnih naloga i koliko je uplaćeno na Budžet općine Maglaj vezano za prekršajne naloge?

Spominjali ste bespravnu gradnju i rušenje bespravnih objekata koji su za rušenje. Već smo razgovarali o kućicama na Omerdinom Polju, o totalnim štetama na kućama na području Bradića itd. Međutim, ovdje i jest problem kaže trebamo firmu za rušenje tih objekata.

Na strani 8. operativni problemi i nedostaci gdje piše ...

Vidim da smo u 2013. godini imali potpisan ugovor sa firmom za rušenje tih objekata. Koja je to firma?

Zamolio bih vas kao inspektora da se zaista uključite aktivnije u rad samog prijedloga Odluke o komunalnom redu.

Vijećnik Hajrudin Fermić, želim da čujem odgovor ukoliko inspektor ima u ovom trenutku spreman odgovor.

1. Koliko je javnih objekata, da li etažirani ili u potpunosti u upotrebi a nije izvršen tehnički prijem, odnosno nemaju upotrebnu dozvolu?

Šta se preduzima o tome, da li se išta preduzima, koji su to javni objekti ovog karaktera.

Da li ste išta poduzimali kada je u pitanju ilegalno izvoženi šljunak 2014. godine koji je bio lociran na dva lokaliteta, jedan je Omerdino Polje i drugi je kod benzinske pumpe? Ja koliko se sjećam jednom je bila licitacija da se taj šljunak proda po jednoj cijeni, pokušalo se prodati, nije se prodalo. Taj šljunak je bio na dvije lokacije, međutim praktično u ove dvije godine se topi, nestaje i volio bi znati šta je s tim?

Da li je zaista moguće da nakon 6 ili 7 godina još uvijek se tačno ne zna čij je objekat Silos? Vidim u vašem izvještaju stoji koliko imam informaciju, da niste sigurni čiji je to objekat. Svi znamo da je objekat u ruševnom stanju i znam da postoji jedna presuda od prije 6-7 godina da to jest općinsko vlasništvo, da je bila žalba po tom pitanju i ne znam kako je završila. U svakom slučaju objekat je koji zaslužuje određeni tretman. Bilo je puno primjedbi i onog okolnog stanovništva i na samu higijenu koja je ostala poslije poplava.

Zijad Džaferović, drago mi je da je bilo pitanja i ovakvih pitanja. Izvještaj u formi u kojoj je napravljen on je dat ciljano da isprovocira pitanja i da isprovocira rješenja.

Iz samog izvještaja sasvim je jasno koliko je široka, specifična i komplikovana ova oblast u kojoj ja vršim inspekcijski nadzor...

Što se tiče prekršajnih naloga naplaćeno je 2.500,00 KM. 1600,00 KM je presuđeno u sudskom postupku to još nije naplaćeno i 500,00 KM visi, radi se o penzioneru nije se žalio i sad je ostalo još sudski postupak. To što se tiče prekršajnih naloga.

Što se tiče dijela pitanja koji se odnosi na bespravnu gradnju, gdje god da krenemo naići ćemo da fali nešto.

Najveći problem u svemu tome je što ljudi bježe od uplanjenja objekata...

Koliko je javnih objekata u upotrebi, ni jedan objekat... Na neka pitanja bi trebao odgovoriti Općinski pravobranitelj, ja se ne bi petljao u to.

Fuad Hajrulahović, što se tiče samog Silosa, najkraće to je još uvijek na Sudu. U postupku privatizacije taj objekat su kupili. Međutim, mi smo se na to žalili, pa smo poništili upis itd.

Što se tiče šljunka, Vijeće je donijelo odluku da se taj šljunak proda. Šljunak iz rijeke Bosne koja je I kategorija u nadležnosti Agencije za sliv rijeke Save ne postoji više, kao što je nekada bilo da se bave šljunkom, podnesu zahtjev pa dobiju. Sada su neka druga zakonska rješenja koja se više odnose na čišćenje korita zbog protoka voda. U tom periodu je izvađeno iz rijeke Bosne određena količina šljunka u skladu sa Naredbom Federalne uprave CZ, mi smo dali nalog da se čisti, pa je federalna inspekcija obustavila.. pa je nakon dužeg vremena rečeno, pošto niko ne može dobiti odobrenje može samo Općina Maglaj, kao i sve druge općine, taj šljunak je izvađen, geometri su snimili, i mislim da se radilo oko 7000 m3 na tri lokacije. Vijeće je donijelo odluku da se taj šljunak proda. Vijeće je donijelo odluku i firma je prihvatila tu cijenu. Koliko imam informacija da je to uplaćeno i da je to završeno. Mi s tim šljunkom nemamo više ništa. Uglavnom i procedura licitacije je završena sigurno i znam da su sredstva uplaćena.

Predsjedavajuća OV, zaključujem raspravu i predlažem na usvajanje

Z A K L J U Č A K

13.1. a) Usvaja se Izvještaj za period 1.1.2016.-31.12.2016. godine

13.2. b) Usvaja se Program rada za 2017. godinu urbanističko-građevinskog i putnog inspektora, te sugeriše

da u realizaciji programa imaju u vidu iznesene sugestije i prijedloge vijećnika vezane za usklađivanje zakona i propisa koje u svom radu koriste inspekcije (tj. da pokrenu postupke za donošenje novih, odnosno usklađivanje postojećih propisa) .

Usvojeno jednoglasno

AD – 14. Nacrt Strategije prema mladima općine Maglaj 2016-2020. ;

Predsjedavajuća OV, prije nego otvorim raspravu, pročitat ću vam zaključak Komisije za statutarna pitanja, Poslovnik i propise koji glasi: Komisija predlaže Općinskom vijeću da donese Odluku kao pravni akt o utvrđivanju Nacrta Strategije prema mladima općine Maglaj.

Vijećnica Kanita Bašić, stav Klub vijećnika SDA je da ćemo mi prihvatiti Nacrt Strategije prema mladima općine Maglaj za 2016.-2020. kao dobru osnovu za javnu raspravu. Smatramo da je ovo iscrpan i velik materijal, koji zahtijeva određene selektivne mjere, dosta statističkih podataka, rezultata istraživanja. Predlažemo da se uzmu u obzir sve primjedbe i sugestije iznesene na sjednici Općinskog vijeća.

Vijećnik Hrnjić Armin, Nacrt Strategije prema mladima općine Maglaj 2016.-2020. je ogroman materijal, zahtijeva dosta rada. Obzirom da je u proceduri Kantonalna Strategija prema mladima smatramo da bi i ovaj Nacrt trebao ići u javnu raspravu kao bi se mogla uskladiti općinska sa kantonalnom strategijom za mlade. Mi predlažemo javnu raspravu u trajanju od 2 mjeseca.

Predsjedavajuća OV, zaključujem raspravu i predlažem na usvajanje

ZAKLJUČAK

14.1. Usvaja se Nacrt Strategije prema mladim Općine Maglaj 2016-2020.

14.2. Prihvata se prijedlog Komisije za statutarna pitanja, poslovnik i propise, da se donese Odluka o usvajanju Nacrta Strategije.

14.3. Zadužuje se Komisija za mlade i ravnopravnost spolova OV Maglaj da organizuje i provede javnu raspravu u roku od 60 dana. U organizaciji javne rasprave i za druge poslove, zadužuje se Općinski načelnik da putem službi pruži svu stručnu i tehničku pomoć Komisiji.

Usvojeno jednoglasno

AD – 15. Informacija o deminiranju, obilježavanju, uništavanju neeksplodiranih ubojnih sredstava te provođenju akcije «Žetva» na općini Maglaj u 2016. godini;

Vijećnik Mustafa Bešić, što se tiče Informacije o deminiranju, obilježavanju, uništavanju neeksplodiranih ubojnih sredstava te provođenju akcije «Žetva» na općini Maglaj u 2016. godini, imam potrebu da iznesem neke stvari.

Naša općina Maglaj je jedna od tri općine u Federaciji koja je najviše minirana. Da ne govorim o mjesnoj zajednici Brezove Dane gdje je bila granica razgraničenja gdje su na obe strane bile postavljene mine. Imamo i sad neeksplodiranih sredstava. Ovdje u informaciji na 2. strani ima slika prioriteta deminiranja za 2017. godinu. Ja bih pitao ove iz CZ da li imaju sredstava i koliko je osigurano, imamo ovdje navedene lokacije... i koliko je planirano da uradite? Imam potrebu da kažem šta nam se dešava imamo sječu šume gdje ljudi svakodnevno dolaze i dešava se to što se dešava. Imali smo i na području Maglaja, ljudi ulaze u te šume, ima vodovoda, šta je i koliko tu urađeno?

Vijećnica Enida Šahman, Klub vijećnika SDP-a Informaciju o deminiranju, obilježavanju, uništavanju neeksplodiranih ubojnih sredstava te provođenju akcije «Žetva» na općini Maglaj u 2016. godini prima k znanju.

Anto Maglica, gospodin Bešić je naveo ove projekte prioritnog deminiranja, znači za 2017. godinu koje smo mi poredali po nekakvom prioritetu u saglasnosti sa Regionalnim odbor Tuzla.

Gospodin Bešić je pitao koliko mi planiramo ove godine deminirati? Samo da napomenem da je na Budžetu Općine Maglaj, planirano 10.000 KM. Ako uzmemo u obzir da je program deminiranja 2,00 KM, koliko je to duluma. Znači mi sa svojim sredstvima ne možemo ništa uraditi. Mi možemo sudjelovati u nekakvom sufinansiranju. Uglavnom su to bila područja I, II i III kategorije, s tim da su I i II kategorija uglavnom deminirana, to su naseljena mjesta, infrastruktura, poljoprivredno zemljište. Ono što je ostalo to je veliki broj to su šumska i nepristupačna područja, a mi svake godine omogućujemo kroz aktivnosti BiH MAK-a i dobro je da još uvijek ima donatora koji svake godine dolaze i daju sredstva...

Predsjedavajuća OV, zaključujem raspravu i predlažem

- **Prima se k znanju Informacija o deminiranju, obilježavanju, uništavanju neeksploziviranih ubojnih sredstava te provođenju akcije «Žetva» na općini Maglaj u 2016. godini.**

AD –16. Izvještaj o dostignutom stepenu usklađenosti normativnih akata Općine Maglaj sa zakonima iz oblasti prostornog planiranja, građenja i komunalnih djelatnosti sa prijedlogom mjera;

Predsjedavajuća OV, izvjestilac po ovom materijalu je Fuad Hajrulahović, ako nema potrebe za uvodnim izlaganjem, otvaram raspravu.

Vijećnik Mirza Bradarić, Meni u ovom materijalu ništa nije jasno. Preambula ova, preambula ona, često se spominje izraz 'u proceduri je'. Šta znači ta procedura, jel to na samom početku, jel to na pola, jel to na kraju aktivnosti itd? Ako može pojašnjenje u tom smislu.

Vijećnica Dženita Smajlović, Klub vijećnika SDA prima k znanju Izvještaj o dostignutom stepenu usklađenosti normativnih akata Općine Maglaj sa zakonima iz oblasti prostornog planiranja, građenja i komunalnih djelatnosti sa prijedlogom mjera.

Vijećnik Hajrudin Ferić, kako kolega Bradarić reče, mi smo u situaciji da vidimo koji je to broj onih neusklađenih akata i akata koji treba da se donesu na OV. Koliko vidimo to je 21. Kad bi smo ih pobrali trebalo bi još sigurno 10-tak akata da se donesu. Meni je žao što ovdje ima odluka koje su navedene a koje od 2002. I 2003. godine treba uskladiti sa zakonom koji je donesen 2014. i 2015. godine. Naravno ne navodeći da je donesen zakon i 2004.2005., ili dva različita zakona u periodu, 5,6,7,8, pa se potpuno donosio novi zakon sa drugačijim sadržajem a istim nazivom 2012., 2013., 2014., pa i 2016. godine. Govorimo mi o drugom procesu i to nam je svima jasno kroz ove ranije odluke. Ja predlažem da mi zadužimo Načelnika da u u narednih 2 mjeseca sa svojim timom u općinskoj administraciji naprave jedan realan hodogram donošenja, usklađivanja akata koji su potrebni da se nađu na sjednicama Vijeća o vodeći računa pri tome o Programu rada Općinskog vijeća.

Da se u naredna dva mjeseca napravi jedan rokovnik aktivnosti za donošenje i usklađivanje akata.

Predsjedavajuća OV, zaključujem raspravu i predlažem na usvajanje

Z A K L J U Č A K

16.1. Usvaja se Izvještaj o dostignutom stepenu usklađenosti normativnih akata Općine Maglaj sa zakonima iz oblasti prostornog planiranja, građenja i komunalnih djelatnosti sa prijedlogom mjera.

16.2. Zadužuje se Općinski načelnik da u roku od 60 dana napravi hodogram donošenja akata koji trebaju biti usklađeni sa zakonima.

Usvojeno jednoglasno

AD – 17. Informacija o kretanju zapošljavanja i nezaposlenosti na području općine Maglaj za 2016. godinu;

Predsjedavajuća OV, otvaram raspravu nije bilo rasprave, zaključujem raspravu i predlažem da

- **Prima se k znanju Informacija o kretanju zapošljavanja i nezaposlenosti na području općine Maglaj za 2016. godinu.**

AD – 18. Izvještaj Komisije za socijalnu zaštitu/skrb i inkluziju općine Maglaj za 2016. godinu (01.01.2016.- 31.12.2016. godine) i Matrica monitoringa implementacije aktivnosti „Akcionog plana jačanja sistema socijalne zaštite i inkluzije u općini Maglaj, sa fokusom na raseljena lica i povratnike, za 2016-2017. godinu”;

Predsjedavajuća OV, otvaram raspravu. Nije bilo rasprave. Zaključujem raspravu i dajem na glasanje

Z A K L J U Č A K

18.1. Usvaja se Izvještaj Komisije za socijalnu zaštitu/skrb i inkluziju Općine Maglaj za 2016. godinu i Matrica monitoringa implementacije aktivnosti „Akcionog plana jačanja sistema socijalne zaštite i inkluzije u općini Maglaj, sa fokusom na raseljena lica i povratnike, za 2016-2017. godinu”.

Usvojeno jednoglasno

VIJEĆNIČKA PITANJA I INICIJATIVE

Vijećnik Benjamin Čičkušić,

1. Tražim odgovor ili da pokrenemo inicijativu vezano za Kino salu, mislim da je izgubila svoju svrhu, nema nikakvih predstava ni filmova ni ništa. Lično poznajem gospodina koji je bio spreman da preuzme kino salu u Maglaju. Tu je i neka moralna obaveza naša da stavimo to u funkciju i to bi bio pun pogodak.
2. Izletišta «Borik». Ne znam šta je sa izletištem «Borik» ne radi? Mislim da bi se moglo svašta nešto uraditi da se uključi omladina u te aktivnosti. Mislim da bi se to moglo dobro iskoristiti.

Vijećnik Firuz Galijašević,

Zdravstvena zaštita za sve nas.

Zaposlen sam u Javnoj ustanovi koja između ostalog ima nadležnosti vezane za zdravstveno osiguranje nezaposlenih osoba. Postoje zakonom određeni rokovi na evidenciji nezaposlenih da bi se ostvarilo to pravo. Posljednjih godina se često javlja problem zdravstvene zaštite za osobe koje ne mogu ostvariti to pravo ni preko Službe za zapošljavanje, ni preko Centra za socijalni rad, a ni preko SBISZ općine Maglaj.

- SBISZ općine Maglaj je nosilac aktivnosti vezano za zdravstvenu zaštitu po osnovu: pripadnosti u OS BiH, RVI i porodicama šehida i poginulih boraca. Takođe, Ministarstvo za rad je preuzelo odgovornost za obezbjeđivanje zdravstvene zaštite: majkama porodiljama i njihovoj djeci do godinu dana, redovnim studentima i osobama starijim od 65 godina a koje nemaju drugi način da ostvare to pravo. Centar za socijalni rad uvodi u pravo na zdravstvenu zaštitu lica koja su u pravu na stalnu socijalnu pomoć, žene starije od 60 godina i muškarce starije od 65 godina a koji nemaju uslove za ostvarivanje prava na penziju samim tim ni na zdravstvenu zaštitu preko Zavoda za PIO/MIO.
- SUGESTIJA je da se ubrza procedura dodjeljivanja zdravstvene zaštite članovima porodica nosioca osiguranja. Inače, članovi moraju proći istu proceduru „koja traje malo duže“ kao i osiguranici, tj. traži se saglasnost Ministarstva za boračka pitanja iako sam mišljenja da to nije potrebno i da se članovi porodica mogu uvesti u pravo na zdravstvenu zaštitu preko nosioca osiguranja u vrlo kratkom roku (par minuta).
- Ostaje PITANJE kako pomoći ostalim stanovnicima općine koji ne mogu ostvariti to pravo ni po kom osnovu, a nisu uspjeli ispoštovati rokove predviđene Zakonom, bez obzira da li oni bili neodgovorni ili neupućeni!? Mi ih zbog toga ne smijemo kažnjavati. Moramo im pomoći. Mnogi stanovnici su zbog nemogućnosti da ostvare pravo na zdravstvenu zaštitu bili prinuđeni promijeniti mjesto prebivališta i „odseliti“ u Republiku Srpsku samo zbog zdravstvene zaštite. To su stanovnici – povratnici iz Radojčića, Bočinje i okoline, i mnogi drugi .
- PRIJEDLOG: SBISZ općine Maglaj, zajedno sa načelnikom općine i općinskim vijećem bi trebalo da pripremi:
 - PLAN i NAČIN rješavanja problema zdravstvene zaštite svih stanovnika općine i članova njihovih porodica koji nemaju nijedan drugi način da ostvare to pravo i to samo u izuzetnim slučajevima (hitni slučajevi, povrede, bolničko liječenje...)
 - Dogovor sa Zavodom za zdravstvo ZDK o visini i načinu plaćanja (paušalno).
- ODLUKA: Odobriti i uvesti u pravo na PRIVREMENO korištenje zdravstvene zaštite svim stanovnicima općine koji nemaju drugi način da ostvare to pravo. Dužina trajanja korištenja prava na zdravstvenu zaštitu je do 3 mjeseca ili do kraja liječenja, izuzev kada korisnik privremene zdravstvene zaštite;
 - zasnjuje radni odnos,
 - ostvari pravo na penziju po Zakonu o PIO/MIO BiH,
 - uključi se u redovno školovanje,
 - promijeni mjesto prebivališta,
 - navršši 65 godina,
 - umre,
 - prestanu okolnosti zbog kojih je privremeno uveden u pravo na zdravstvenu zaštitu.

Ja ću pročitati zaključke Komisije za društvene odnose, odnose sa vjerskim zajednicama, boračko invalidska i socijalna pitanja:

1. Komisija predlaže Općinskom vijeću da uputi inicijativu predsjedavajućem Skupštine ZDK kojim će tražiti da se u Zakonu o zdravstvenoj zaštiti ZDK uvedu odredbe kojim bi se licima koja nemaju drugi način ostvarivanja prava na zdravstvenu zaštitu obezbijedila zdravstvena zaštita putem ovog Ministarstva ili Ministarstva za rad, socijalnu politiku i izbjeglice ZDK, uključujući i nadležne službe u Općini Maglaj.
2. Da se o ovoj inicijativi Općinsko vijeće Maglaj izjasni na prvoj narednoj sjednici.
3. Da o ovoj inicijativi član Komisije Firuz Galijašević upozna Općinsko vijeće na prvoj narednoj sjednici.

Predsjedavajuća OV, o inicijativama se nećemo izjašnjavati bit će prosljeđene službama na odgovor.

Vijećnica Irena Herceg,

Pitanje JU Dom kulture «Edhem Mulabdić»:

Zašto nemamo priliku da pogledamo neki film ili predstavu u našem gradu?

Smatram da je žalosno da naši građani idu u druge gradove da bi pogledali film ili predstavu i predlažem da se što prije riješi taj problem.

Vijećnik Mirza Bradarić,

Imam jedan zahtjev u stvari inicijativa ispred grupe građana iz ulice 1. marta. Konkretnije građana koji žive na području od stare zubne ambulante do kružnog toka.

Ja sam već par puta u prethodnom mandatu govorio i neke stvari su riješene, a ja ću pročitati ovaj zahtjev ili inicijativu:

Grupa građana iz ulice 1.marta

Predstavnici grupe građana:

- Almin Smajlagić 061 302 253
- Amir Smajlagić 061 610 111
- Samir Hodzić 061 361 660

OPĆINA MAGLAJ

Općinski načelnik gospodin Mirsad Mahmutagić

02.03.2017.godine

Predmet : Zahtjev

Poštovani,

Kao građani ulice 1.marta, prinuđeni smo da Vam se obratimo iz razloga *brzine* koju motorna vozila razvijaju ovom ulicom danju, a naročito u večernjim satima, gdje se nerijetko razvijaju brzine preko 100 km/h, te se vrše preticanja i izvode utrke između više vozila. U ovoj ulici živi mnogo djece, mnogo školske djece prolazi ovom ulicom i naravno, jako puno sugrađana šeta tom ulicom, a naročito u večernjim satima i kada je lijepo vrijeme.

Mi znamo da je ova inicijativa već inicirana na jednoj od prethodnih sjednica i da je već dobar dio urađen, ali nam nije jasno kako je moguće da je u istoj ulici u jednom dijelu ograničenje brzine 40 km/h, a u drugom dijelu 50 km/h !? Naime, od stare zubne ambulante pa do autobuske stanice je ograničenje od 40 km/h, a od iste te ambulante pa do kružnog toka je ograničenje brzine od 50 km/h. Obzirom da stubovi za vertikalnu signalizaciju postoje, mi Vas ovom prilikom molimo da samo umjesto ograničenja od 50 km/h stavite ograničenje brzine od 40 km/h na dijelu od stare zubne ambulante do kružnog toka (dva znaka),jer nije isto kada autobusi, kamioni ili automobili voze 40 ili 50 km/h. Također Vas molimo da na tom dijelu uradite i horizontalnu signalizaciju (zebre) jer ni one nisu označene.

Ovom prilikom tražimo i od PS Maglaj da na tom dijelu vrši češće kontrole motornih vozila, a naročito u večernjim satima.

Možda će neko reći da sitničarimo, ali nemojmo dopustiti da radi 10-ak km/h neko pogine i da svi zajedno moramo nositi nekoga na savjesti, mi što nismo tražili, a Vi što ste se oglušili po ovom zahtjevu ! Ako realizacija ovog zahtjeva nije moguća, molimo Vas da nas pismeno obavijestite o istom.

Unaprijed zahvalni,

Građani ulice 1.marta

U prilogu : Potpis građana (61) koji žive u dijelu ulice 1.marta od stare zubne ambulante do kružnog toka.

Ovaj zahtjev upućen je Predsjedavajućoj, Načelniku gospodinu Mahmutagiću i gospodinu Hajrulahoviću kao šefu Službe za urbanizam.

Vijećnik Edib Delić,

Da li su sredstva od GSM licence koja su namijenjena za realizaciju projekta rekonstrukcija putnog pravca Karačinac - Igrište, da li su legla na račun Općine i ako su legla kada se planira krenuti u realizaciju ovog projekta? Obzirom da će vrlo brzo građevinska sezona pa da se i mi možemo pripremiti.

Vijećnik Safet Jašić,

1. Ispred Kluba SDA postavljam pitanje: Da li će biti isplata na ime podsticaja za proizvođače jagodičastog voća na općini Maglaj?

Vijećnik Bešić Mustafa,

1. Tražim da mi odgovorite:

Šta ste poduzeli na sankcionisanju kamiona firme «BBM» Sarajevo koji dolaze skoro svake sedmice i pri tom odvoze nelegalno ugallj iz MZ Brezove Dane - Domislica? Više puta smo prijavili ispred MZ-a, pa nas zanima da

li ste šta poduzimali po ovom pitanju. Kamioni i dalje dolaze samo što se sada kreću dionicom puta Kopice-Dubrave, spuštaju se na rudnik u Brezovim Danama. Zadnji put su viđeni u petak, 24.02.2017.godine oko 12 sati. Tražimo od Policijske stanice Maglaj da se pojača kontrola i da se suzbije nelegalan odvoz uglja iz naše MZ-e.

2. Tražim da se izvrši sanacija puta Novi Šeher-Mladoševica-Domislica. Uslijed velikih padavina koje su bile u proteklom periodu došlo je do oštećenja. Voda je odnijela posipni materijal, pijesak koji se nalazio uz rub asfalta, tj. bankinu. Imamo otežano kretanje motornih vozila, pogotovo kad dođe do mimoilaženja vozila iz suprotnog smjera. Vjerujemo da ćete odgovoriti pozitivno na ovaj zahtjev, a smatramo da nisu potrebna ni velika sredstva nekoliko kamiona pijeska.

Vijećnik Hajrudin Fermić,

Ispravka jedne naše pogreške.

Već nekoliko vijećnika je pomenulo Policijsku stanicu. Mi smo na neki način napravili jednu tehničku grešku što nismo u naš program rada Općinskog vijeća stavili razmatranje Informacije o javnom redu i miru, bezbjednosti saobraćaja i kriminalitetu za prethodni period.

Ja danas predlažem da zatražimo od Stanice javne bezbjednosti tu informaciju da bi se moglo staviti da li na slijedeću sjednicu ili eventualno na onu drugu i da raspravljamo i ova pitanja.

Ja pratim i druga Općinska vijeća i svi dobijaju od ZDK te informacije i već su davno raspravljali, a mi vjerovatno zato što nismo planirali ostali smo uskraćeni za te informacije, a ima svakako potrebe da se o tome razmatra na narednoj sjednici.

Općinski načelnik Mirsad Mahmutagić, nekoliko stvari ću prokomentarisati:

- U potpunosti se pridružujem stavovima vezano za Kino salu. Zaista imamo jednu modernu kino salu koja je zatvorena i ne služi svojoj svrsi i trebamo u što kraćem roku staviti u punu funkciju. Ja sam to nedavno napomenuo direktorici, a tražit ću informaciju da vidim šta se više dešava u Domu kulture i šta se dešava u kino sali. Za organizaciju Akademije 1. marta sam dobio informaciju da ne radi ozvučenje... Ja sam otvoren za bilo kakve razgovore, ako ima neko ko je zainteresovan i za upravljanje te kino sale, da se razgovarati i na tu temu i neka onaj ko upravlja to i profitira i da bude korisno svima nama. Ako ima neko razgovarat ćemo da vidimo kakve su ideje itd.

- Što se tiče Izletišta «Borik» to je privatni restoran koji nije u funkciji, vlasnik ga i ne pokušava staviti u funkciju niti pokušava da ga proda. Bilo je nekih razgovara u smislu da bi se tu eventualno pravio dom pensionera, ali to je priča o tom-po tom i u svakom slučaju oko Maglaja imamo dobrih lokacija za odmor i rekreaciju. To možemo kod određene projekte od odgovarajućih institucija dobiti novac i na taj način riješiti takve lokacije...

- Što se tiče ulice 1. marta mogu kao građanin, a i kao Načelnik općine reći da nije problem ograničenje 50 i 60, problem je što se vozi 80, 90 i 120 km/h. To je veći problem, meni je neshvatljivo da se to dešava pokraj policijske stanice.

- Gospodine Delić, novac od 90.000,00 KM je na računu Općine Maglaj.

- Koliko znamo svi u Budžetu fali nam sredstva za poljoprivredu, znate i ona odluka iz bivšeg saziva Općinskog vijeća 40 – 60 korist poljoprivredne proizvodnje, poticaja će biti.

- Gospodin Bešić za rudnik «BBM» i ja sam dobio neke informaciju da idu tim nekim lijevim putevima da izlaze negdje u Čobe. Dolazili su da razgovaraju iz rudnika «BBM». Moj stav koji sam rekao predstavnicima BBM da izbor između mještana i «Natron-Hayat» da su oni posljednji na redu, a isto tako mislim da bi trebalo da se napravi projekat za to područje, a isto tako da se ispoštuju oni zahtjevi iz ugovora o prijateljskom okruženju. To je nešto što će doći na red i da razgovaramo sa mjesnom zajednicom.

- Sanacija puta prema Mladoševici, mi ćemo u narednom periodu imati puno posla kad je u pitanja sanacija i već vidite da ima dosta udarnih rupa koje su primjetne i u samom gradu. U nekih mjesec dana mi ćemo intenzivno raditi na redovnom održavanju saobraćajnica da saniramo te i udarne rupe pogotovo u sjevernom dijelu na ulazu u grad.

- Kako reče gospodin dopredsjedavajući, tražit ćemo od Policijske stanice da nam dostave sveobuhvatnu Informaciju o stanju bezbjednosti u svakom pogledu tako da ćemo to staviti na jednu od narednih, ako ne na narednu sjednicu Općinskog vijeća.

Završeno u 17,40 sati.

Zapisničar,
Mirsada Skejčić




PREDSJEDAVAJUĆA OV,

Svjetlana Zamboni

Sastavni dio zapisnika čini tonski zapis, a CD cjelokupne sjednice dobit će sve političke stranke koje participiraju u Općinskom vijeću Maglaj.